

Olwaandiko lwa Paulo aha Barúumi Obweébeembezi

Olwaandiko olu lwa Abarúumi lukaandikwa ne entumwa Paulo. Obuchilo bwo kwaandika olwaandiko olu, Paulo akaba atakaguyeéliile omuzi-hwa gwa Rúumi. Abakristu abo ba Rúumi, bakaba bali Abayahudi hamo na abaantu áabo abatali Abayahudi (ensoonga, Abanyamahaánga). Paulo akaandika olwaandiko olu abone kubeégesa Abakristu ba Rúumi nko óokwo elikweendelwaho aha mwiikiliza wa Kristu abone kulama omu kwiikiliza, no okusoombookelwa amagaambo agasobile áago agalikuhiha kumugwamo kwiingana no okwo kwiikiliza.

Omu lwaandiko olu aha Barúumi, Paulo naayegesa empola zo obuchuúnguzi obwo twaakuhicha kububonesa kulabila ahali Yeézu Kristu weénka. Echiteékuzo echikúlu cha Paulo omwaandiki wo olwaandiko olu chili omu magaambo áago agalikugaamba gáti, *“Ínye tínkuzila ensóni kwaátula ezo Mpola Nzima, habwo kuba nigo amagala ga Múungu go kuchuúngula abaantu bóona áabo abalikumwiikiliza Yeézu, kubaandiza Abayahudi kuhicha abaantu áabo abali Abanyamahaánga. Ezo Mpola Nzima, neeyoleka butúnu óokwo Múungu alikubalila abaantu kuba abagololoke omu méeso goómwe habwo omuháanda gwo okwiikiliza kwoónka”* (1:16-17). Hamo na ago, Paulo naamanyisa butúnu nka nikwo obuchuúnguzi óobwo twaakuhicha kwiinaankula

kuluga ahali Yeézu Kristu, nibutugasa kutúula omu bulami bwo kumunuliza Múungu (omulyaango gwe 12–15).

Empola

¹ Olwaandiko olu ndwaandikile íinye Paulo, omuzáana wa Kristu Yeézu. Íinye nkéetwa kúba entumwa yoómwe, naátóozibwa iímbe niinyole-keelela Empola Nzima kuluga ahali Múungu.

² Ezo Mpola Nzima, niyo éezo Múungu akalagana kulugilila kala, kulabila aha babáasi boómwe omu Maandiko Matakatiifu.

³ Ezo Mpola Nzima na habwo Omutábani woómwe Múungu. Aha bumuuntu bwoómwe, akazaalwa kulugilila omu lugaanda lwo omukáma Daudi,*

⁴ náho habwo Omwooyo Mutakatiifu, Múungu akamutooza kuba Omutábani owo obuhicha bwóona, óobu akamuzoola kuluga omu bafwiile. No ogwo mutábani niwe Yeézu Kristu, Omukáma wéetu.

⁵ Okulabila hali weényini, Múungu akaámpa embabazi zo kuba entumwa yo Omukáma Yeézu, kuba abali Abanyamahaánga† babone kumwiikiliza no kumukoondookela, ni izíina lyoómwe likuzibwe.

⁶ Íimwe neemwe muli omuli abo nyini na mweesilwe kuba abaantu ba Yeézu Kristu.

1:1 1:1 Osome Amakúlu ge Entumwa 9:15; Abagalatia 1:1, 15.

* **1:3 1:3 Daudi:** Habwo obusoomboozi bwooli osome *Obusoomboozi habwa Amagaambo Agagumile*. † **1:5 1:5 Abanyamahaánga:** Habwo obusoomboozi bwooli osome *Obusoomboozi habwa Amagaambo Agagumile*.

⁷ Niimbaandikila ímwe abeekiliza bóona áabo muli okwo Rúumi. Múungu ayina engoonzi neemwe bwooli, na yaábéeta mubóne kuba abaantu boómwe abatakatífu.‡

Embabazi no obuhóolo kuluga ahali Isíichwe Múungu, na aha Mukáma Yeézu Kristu, bibe neemwe.

Paulo naayefúuza kubayeélela abeekiliza ba Rúumi

⁸ Ha kubaanza, niimusíima Múungu kula-bila hali Yeézu Kristu, ha bwéenyu mwéena, habwo kuba empola habwo okwiikiliza kwéenyu nizilaangaanwa omu nsi yóona.

⁹ Múungu óogwo ndikulamya aha muganya gwaanze gwóona omu kubalaangaanila abaantu Empola Nzima yo Omutábani, naamanya óokwo ndikubasabila obutóosa.

¹⁰ Niinsaba buchiile nka nikwo, lúundi Múungu kaálaayeénda, amboneseze omwáanya gwo kwíiza hali ímwe zuba zuba.

¹¹ Niinsaba íintyo, habwo kuba nnyina echihika bwooli kubonana neemwe, mbone kugumya okwiikiliza kwéenyu habwo kubaha omugisa gwo omwooyo.

¹² Éecho ndikweenda ni nka nikwo, okwiikiliza kwéenyu kuungumye ínye, no okwiikiliza kwaanze kubagumye ímwe.

¹³ Abeekiliza bazeenzi baanze, niinyeénda mu-soomboókelwe nka nikwo, entúlo nyíinzi mbele niintegeza kuhika hali ímwe, náho kuhicha óobu

‡ **1:7 1:7 Abatakatífu:** Habwo obusoomboozi bwooli osome Obusoomboozi habwa Amagaambo Agagumile.

nnyaangiilwe. Niinyeénda, mbone kubonesa amabonwa mazima okwo, nko óokwo nkakola aha baantu abáandi áabo abali Abanyamahaánga.

¹⁴ Múungu andagiiliile iímbe niinyolekelele Empola Nzima omu baantu bóona, omu Bayunani no omuli áabo abatali Abayunani,§ omuli abo abeena amasala no omuli áabo abatéena amasala.

¹⁵ Ha bwéecho, niinyegoóngá bwooli nnyize kubalaanga Empola Nzima no óobu okwo owáanyu Rúumi.

Amagala ge Empola Nzima ya Múungu

¹⁶ Ínye tiínkuzila ensóni kwaátula ezo Mpola Nzima, habwo kuba nigo amagala ga Múungu go kuchuúngula abaantu bóona áabo abalikumwiíkila Yeézu, kubaandiza Abayahudi kuhicha abaantu áabo abali Abanyamahaánga.

¹⁷ Ezo Mpola Nzima, neeyoleka butúnu óokwo Múungu alikubalila abaantu kuba abagololoke omu méeso goómwe habwo omuháanda gwo okwiikiliza kwoónka. Ni nko óokwo Amaandiko Matakatiifu galikugaamba gáti, “Omugololoke, aláaba naatuúla omu kwiikiliza.”

Múungu naachwaaziika abaantu habwe ebiheno byáabo

§ **1:14 1:14 Bayunani no omuli áabo abatali Abayunani:** Obuchilo óobwo olwaandiko bu lwaayaandikilwe, olulími lwa Abayunani ne entúungwa záabo bikaba nibisoombooka omu nsi nyíenzi. Abaantu áabo bakaba nibamanya kuhooya olulími lwe Echiyunani bakaba nibabagaya abaantu bóona áabo abakaba batacumanya kuhooya olwo olulími no kukola amagaambo áago agalikwiingana ne ezo ntúungwa. **1:17 1:17** Osome Habakuki 2:4.

¹⁸ Múungu weényini ayoleka ha bwéelu echihulumuko choómwe kuluga omu igulu, omu kubeéhoolela abaantu áabo abalikumwáanga no kukola obuzilwa. Abaantu abo abalikwáanga amazima goómwe, ha buzilwa bwáabo.

¹⁹ Náho ti nka nikwo tibakusoombookelwa empola za Múungu. Múungu weényini akaboóleka butúnu empola zoómwe, ha bwéecho nisisoombooka omu baantu.

²⁰ Aho aha bubaandizo Múungu akahaanga ebihaángwa byóona. Ha bwéecho kulugiilila aha buchilo obwo, abaantu bóona nibamusoombookelwa kulabila hali éebyo akahaanga, no óobu weényini aláaba atakubonwa. Ebihaángwa ebyo nibyooleka entúungwa zoómwe óokwo zil-iho, káandi nibyooleka nka nikwo ayina amagala góona, niwe owo obucha no obuchiile. Ha bwéecho, tibakuhicha kutóonga nka nikwo tibakumusoombookelwa.

²¹ No óobu abalikumusoombookelwa Múungu nka nikwo aáli, náho nibabulwa kumukúza nali kumusiima nko óokwo agasize. Beena ebiteékuzo bíbi, no obwéenze bwáabo buli omu nsiimbaazi.

²² Nibeesiingiza nka nikwo nibo abeena amasala, náho na abafweéla.

²³ Baálekileho kumulámya Múungu óogwo al-iho obucha no obuchiile, baalamya ebisusano bya bamúungu ebilikususana na abaantu áabo abafwa, enyonyi ne enyameéswe ezilikulibata ne ezilikwaázuya éenda.

²⁴ Ha nsoonga ezo, Múungu akabaha ennáku yo kubaleka bakulaatile oluhagali lwaabo lwo kukola amagaambo ge ensoni ha muháanda gwe emibili yáabo.

²⁵ Bakalekaho amazima ga Múungu, baalamya ebisuba omu kulamya ebihaángwa no kubi-heéleza, ha mwáanya gwa Múungu Omuhaangi. Weényini niwe agasize kukú梓bwa obucha no obuchiile! Amina.

²⁶ Ha bwéecho, Múungu akabaha ennáku yo kubaleka babe nibeekolela amagaambo ge en-soni ha muháanda gwe emibili yáabo. No óobu abakázi baálekileho kukoza emibili yáabo nko óokwo yaahaangilweho, na nibazikolesa nko óokwo etalahaangilwe kukoleswa.*

²⁷ Bityo nyini abaséeza nábo, baálekileho kukoza emibili yáabo nko óokwo ekahaangwáho, omukwaáta no omukázi. Abaséeza nibeeligila boónyini boónka, nibakola amagaambo ge ensóni. Habwo kukola bátyo, beésoliile boónyini ennáku éezo ezilikwiingana ne ebikolwa byáabo byo okuhabisa.

²⁸ Mbwéenu, abaantu baángile kumusoom-bookelwa Múungu, ha bwéecho, Múungu náwe abalekile babe nibakulaatila ebiteékuzo byáabo byo kutuumaanga, nibakola amagaambo áago agatakweendelwa kukolwa.

²⁹ Beézwiile engaanda nyínzi bwooli za buli buzilwa, etuúнку za amabonwa, ni ichubi. Nibeénda endwaana, obwíisi, obuteélanisi, okugaamba ebisuba na beena echihika chibi. Na abanyeegani ba abaantu,

* **1:26 1:26 Abakázi baálekileho kukoza emibili yáabo nko óokwo yaahaangilweho, na nibazikolesa nko óokwo etalahaangilwe kukoleswa:** Ensoonga yoómwe ni nka nikwo, abakázi baálekileho kulyaama na abaséeza báabo, na balikubyáama na abakázi abáandi.

³⁰ beena okweébeeheleza, na nibamutámwa Múungu. Tibakweétwaalalika amagaambo ga bazeenzi báabo, káandi na abaantu be emyeésiingizo no kweébuga. Obuchilo bwóona nibaloondela omuháanda omusha gwo kukola obuzilwa. Tibakukoondookela abazéele báabo,

³¹ baabeele abasilu, tibachihikiliza emilago yáabo, tibéena engoonzi nali echiganyizi.

³² Abaantu abo nibasoomboókelwa kuzima nka nikwo, omuuntu kaálaakola ebikolwa byo obuzilwa nke ebyo, nichiba chimugasize kusiingaalichwa na Múungu. No óobu bityo, tibakusaaswa! Nibazeendelela kukola ago, káandi nibazila báti abáandi kabalikugakola, nibakola kuzima.

2

Múungu alaáchwaáziika abaantu bóona atéena kweendeza

¹ Mbwéenu, íwe munywáani waanze oli oóha, noolamulila bazeenzi baawe? Toyina amagala ago no obuche bwa akáti no obu olaaba oli oóha. Náho no óobu íwe tokuhicha kweéhohoola omu méeso ga Múungu! Léeba, obuchilo óobwo olikuchwaáziika abáandi, niho omanyenka nka nikwo nooyechwaaziika íwe nyini, habwo kuba amagaambo gáabo go obuzilwa nigo ago nyini neewe olikukola.

² Íichwe twéena nitusoomboókelwa nka nikwo Múungu naachwaaziika ha mazima abaantu áabo abalikukola amagaambo nka ago.

³ Náho íwe munywaani waanze, noolamulila abaantu abáandi kunu íwe nyini noogakola amagaambo ago nyini. Otateekuza nka nikwo Múungu naakuleka atéena kukuchwaáziika.

⁴ Múungu no omweésigwa bwooli, naakuzilila obufula bwíinzi, no kukweémela bwooli. Náho óobu íwe, léeba noogagaya ago góona? Tokusoombookelwa nka nikwo naakwooleka obufula bwoómwe, obóne kubitamwa ebiheno byaawe no kumuhiindukila weényini?

⁵ Habwo kuba noolemeela omuganya gwaawe, nooyaánga kubitamwa ebiheno byaawe no kumuhiindukila Múungu. Ha bwéecho mbwéenu, nooyesuúgaanisiza ennáku aha chilo echo che echihulumuko obuchilo Múungu alaákola obulamuzi bwoómwe bwa amazima.

⁶ Echilo echo, Múungu alaámuha buli muuntu kwiingana ne ebikolwa byoómwe.

⁷ Alaábaha obulami bwo obucha no obuchiile abaantu áabo abalikweéyomeleza omu kukola ebizima, habwo kuba nibaloondela ikuzo, isima no obulami éebyo ebitakusiisikala.

⁸ Náho naabatamwa no kubeéhoolela aha chihulumukoche abeena obwáaye áabo abalikwáanga kutégeza agali aga amazima na nibasola kukola obuzilwa.

⁹ Abaantu bóona áabo abalikukola amagaambo go obuzilwa, alaábaha ennáku mpaango ne ebyaágalazo, kubaandiza Abayahudi kuhicha abaantu abo abali Abanyamahaána.

¹⁰ Náho abaantu bóona áabo abakola ebizima, alaábaha ikuzo, isima no obuhóolo, kubaan-

diza Abayahudi kuhicha abaantu abo abali Abanyamahaánga.

¹¹ Múungu tasoloola muuntu weéna weéna.

¹² Abaantu abo abali Abanyamahaánga abalikukola ebiheno. Balaásiingaalichwa, no óobu baláaba batéena kubisoombookelwa ebilangilo bya Musa.* Abayahudi, no óobu balikusoombookelwa ebyo bilagilo, nábo nibakola ebiheno, na balaálamulilwa kwiingana ne ebyo bilagilo.

¹³ Nibachwaaziíkwa, habwo kuba Múungu takumubalila kuba omugololoke omu meeso goómwe omuuntu óogwo alikuhuliiliza kwoónka ebyo bilagilo, náho óogwo alikukola áago ebilangilo bilikwoólekeelela agakole.

¹⁴ Abaantu áabo abali Abanyamahaánga, abo abatakusoombookelwa ebyo ebilangilo. No óobu bityo, kabalikukola ebizima kwiingana ne ebiteékuzo byáabo, na amagaambo ago ni nko óokwo ebilangilo bya Musa bilikwoólekeelela, aho neeyoleka nka nikwo nibasoomboókelwa kukola áago agalikugasa.

¹⁵ Nibooleka aha bikolwa byáabo nka nikwo éecho echilikweendelwa omu bilagilo, chaandikilwe omu miganya yáabo. Entúlo ezíindi ebiteékuzo byáabo nibibalegelela, ne entúlo ezíindi nibibatoonganila.

¹⁶ Nikwo chilibaho aha chilo cho omuchwaáziiko. Múungu alyaáchwaáziika abaantu ha magaambo gáabo ga bweeseléke kulabila ahali Kristu Yeézu, kwiingana ne Empola Nzima yi

* **2:12 2:12 Musa:** Habwo obusoomboozi bwooli osome *Obusoomboozi habwa Amagaambo Agagumile.*

ndikwoólekeelela.

Okugooka kwa Abayahudi habwe ebilangilo

¹⁷ Íwe óogwo olikweéyeta nka nikwo oli Omuyahudi owa amazima, nootégeza kuba owa amazima omu méeso ga Múungu habwo kweékomya ebilangilo bya Musa. Mala nooyesiingiza nka nikwo íwe oli omuuntu wa Múungu.

¹⁸ Nooyehulila nka nikwo noosoomboókelwa éebyo Múungu alikweenda okole, na waábonesize kusoombookelwa amazima, habwo kuba oyegezizwe ebilangilo byoómwe.

¹⁹ Nooyeesiga bwooli nka nikwo íwe oli omweébeembezi wa abaantu abo abali Abanyamahaánga, nko óogwo alikweébeembelela abahume, nali nko olumuli óolwo olulikumulikila abali omu nsiimbaazi.

²⁰ Nooyehulila nka nikwo íwe no omweégesa wa abaantu abo abali nka abáana abacheche, ha kuba tibakusoombookelwa amagaambo ga Múungu. Ogasize kuba omweégesa wáabo, ha kuba ebilangilo bikweegesize empola zo obumanyi bwóona no obubuya bwa amazima.

²¹ Íwe nooyegesha abaantu abáandi, náho ha bwaáchi tokukola áago olikweégesa? Nooboolekeelela abáandi nka nikwo bataákwiiba, náho ha bwaáchi íwe hanu nooyiba?

²² Íwe noogaambila abaantu nka nikwo bataákusaambana, náho ha bwaáchi íwe hanu noosaambana? Íwe nootamwa ebisusano bya amagala go obuteéka, náho ha bwaáchi íwe hanu

nooyiba ebiintu kuluga omu nzu zo kutaám-bila ebisusano ebyo?

²³ Íwe noobona e-bilagilo ne echiintu che ensoonga bwooli, náho noomugoókela Múungu habwo kuhenela e-bilagilo byoómwe.

²⁴ Ha bwéecho, ni nko óokwo Amaandiko Matakatiifu galikugaamba gáti, “Izíina lya Múungu nilizumwa na abaantu áabo abali Abanyama-haánga, habwe ebikolwa byo obuzilwa éebyo mulikukola.”

*Kusálwa ikóba lyoónka tikukuhicha
kuchuúngula Abayahudi*

²⁵ Kusálwa ikóba[†] kwaawe kwiina omugaso, kábilaaba nookola nko óokwo e-bilagilo bilikwoólekeelela. Náho kábilaaba noobihenela e-bilagilo, kusálwa ikóba kwaawe nikuba kutéena mugaso gwoóna gwóona, káandi íwe noóba nko omuuntu óogwo atasazilwe ikóba lyo obuséeza.

²⁶ Ha bwéecho, omuuntu óogwo atasazilwe ikóba lyo obuséeza, kábilaaba naakola nko óokwo e-bilagilo bilikwoólekeelela, Múungu naamukuúnda nko omuuntu óogwo asázilwe ikóba lyo obuséeza.

²⁷ Niho abaantu áabo abali Abanyama-haánga abatasázilwe ikóba lyo obuséeza, náho nibabikoondoókela e-bilagilo óokwo bilikwoólekeelela, ebikolwa byáabo bizima nibyeeyata nka nikwo íwe Omuyahudi oli omukola bihenno. Íwe osázilwe ikóba lyo

2:24 2:24 Osome Isaya 52:5; Ezekieli 36:20, 22. **† 2:25 2:25**
Kusálwa ikóba: Habwo obusoomboozi bwooli osome *Obusoom-boozi habwa Amagaambo Agagumile.*

obuséeza, káandi noosoomboókelwa ebilangilo bya Múungu, náho noobihenela ebyo bilagilo.

²⁸ Habwo kuba omuuntu takuba Omuyahudi kwiingana na akazeendele koómwe ka ahéelu, no óobu okusálwa kwoómwe kwi ikóba lyo obuséeza aha mubili tikukumukola aábe Omuyahudi wa amazima.

²⁹ Mmahi! Omuyahudi wa amazima no óogwo agomookela Múungu aha muganya gwoómwe gwóona. Káandi okusálwa ikóba lyo obuséeza ne echigaambo chilikukulwa no Omwooyo Mutakatíifu omu muganya gwoómwe, ti aha kweékomya ebilangilo bya Musa. Omuuntu nko ogwo, takwiinaankula isima kuluga omu baantu, náho naasiimwa na weényini Múungu.

3

Emigaso aha Bayahudi

¹ Ha bwéecho, heena mugaso chi kuba Omuyahudi? No kusálwa ikóba lyo obuséeza heena mugaso chi?

² Na mazima nka nikwo, kuba Omuyahudi heena emigaso múnzi. Echigaambo cho kutaándika ni nka nikwo, Múungu akabategeza Abayahudi amagaambo goómwe babone kugabíika no kugeékomya.

³ Náho Abayahudi abáandi tibalabeele abeésigwa omu kweékomya amagaambo goómwe. Ngási, tugaámbe nka nikwo abo Bayahudi kuleka kuba abeésigwa hali Múungu nikuhiindula weényini aleke kuba omweésigwa?

⁴ Mmahi, no obuche bwa akáti! Abaantu bóona na ababéehi, náho Múungu amanyisa amazima goónka. Ni nko óokwo Amaandiko Matakatiifu galikugaamba habwa weényini gáti,

“Buli óobu olegelela,

elaásoombooka ha bwéelu nka nikwo ama-
gaambo gaawe na aga amazima.

No omu kuchwaáziika,
íiwe osiínga.”

⁵ Ha bwéecho, obuchilo Múungu naatukona habwe ebiheno byéetu íichwe Abayahudi, nibyo bilikwooleka ha bwéelu nka nikwo Múungu no wa amazima. Kábilaaba Múungu naatwaagalaza, tugaámbe nka nikwo Múungu tali wa amazima?

⁶ Mmahi, no obuche bwa akáti! Byaakubeele bili bityo, Múungu yaakaáhikize aáta kubach-
waáziika abaantu be éensi?

⁷ Náho obúundi abaantu baakaáhicha kugaamba báti, “Kábilaaba kubulwa obweésigwa kwaanze nikubakola abaantu bamanye nka nikwo Múungu no omweésigwa bwooli, na habwe echo kumuha ikuzo, mbwéenu ha bwaáchi nchaáchwaaziikwa kuba owe ebiheno?”

⁸ Nicho abaantu balikutubeeheleza báti, “No óobu Paulo náwe naayegesa aátyo!” Nikwo abaantu abáandi baambeeheliize omu kuun-
degelela nka nikwo no óobu ínye Paulo ni-
inyegesa iíntyó. Náho ínye niingaámba nka
nikwo, abaantu abo bóona balaáchwaaziikwa kwi-
ingana no obuzilwa bwáabo.

*Tábaho omuuntu ayina amazima omu méeso
ga Múungu*

⁹ Mbwéenu, tugaámbe chiíha? Ngási, tugaámbe nka nikwo íchwé Abayahudi twiine omugaso kusaaga abaantu abáandi áabo abatali Abayahudi? Mmahi! Nko óokwo naalámazile kubamanyisa nka nikwo, Abayahudi hamo na áabo abali Abanyamahaánga, bóona nibatuúngwa ne ebiheno.

¹⁰ Ni nko óokwo Amaandiko Matakatiifu galikugaamba gáti,

“Táliho no óobu omuuntu oómo omugololoke omu méeso ga Múungu.

¹¹ Táliho omuuntu óogwo alikusoombookelwa amagaambo ga Múungu, káandi táliho óogwo alikutabuuza kumusoombookelwa.

¹² Abaantu bóona baáhugeene tibachimukoon-dookela Múungu,

bóona tibachigasa káandi omu méeso goómwe. Táliho no óobu omuuntu oómo akola amazima.”

¹³ “Omunwa gwáabo ni nke eémbi etafuliílwé, endími záabo nízisohóza okubeéheleza.”

“Kuluga omu kanwa káabo

nigasohola amagaambo ageene obusúungu nko bwe enzóka.”

¹⁴ “Eminwa yáabo eyizwiile amagaambo go kuchéena, na amagaambo áago agalikusaasisa.”

¹⁵ “Amagulu gáabo nigalahúka omu kuhutaaza no okwiita.

¹⁶ Hóona áaho balikuzeenda, nibasíisa no kusikiza.

3:12 3:10-12 Osome Enzina 14:1-3; 53:1-3; Omwoolekeezezi 7:20.

3:13 3:13 Osome Enzina 5:9.

3:13 3:13 Osome Enzina 140:3.

3:14 3:14 Osome Enzina 10:7.

17 Tibakusoombookelwa kutúula hamo na abáandi omu buhóolo.”

18 “Tibakumweétegeezeza Múungu no obuche bwa akáti.”

19 Mbwéenu, íichwe nitusoomboókelwa nka nikwo, obuchilo Amaandiko Matakatiifu kagalikusoomboola echiintu choóna chóona, nigasoomboola abaantu áabo bakaháabwa amaandiko ago. Amaandiko gakatéebwaho, kuba bóona omu nsi yóona bataákuba ne echeéteelelekezo cho kweétoonganila obuchilo Múungu alaáchwaáziika. Bóona balaásoombookelwa nka nikwo bakwíilwe omuchwaáziiko gwa Múungu.

20 Omuuntu weéna wéena talibalwa kuba omugololoke omu méeso ga Múungu habwo kweékomya ebilangilo byoómwe. Omulimo gwe ebyo bilagilo, no kumanyisa abaantu bóona nka nikwo na abaheni.

Omuuntu alikubalwa kuba owa amazima habwo kumwiíkiliza Yeézu

21 Náho óobu, Múungu atwoólekile omuháanda gwo kubabalila abaantu kuba abagololoke omu méeso goómwe, na ti habwo omuháanda gwe ebilangilo. No óobu amaandiko ge ebilangilo bya Musa na amaandiko ga ababási nigagaámba butúnu empola ezo.

22 Omuháanda ogwo nigwo kumwiíkiliza Yeézu Kristu. Abaantu bóona áabo abalikumwiíkiliza Yeézu Kristu, Múungu naababalila kuba abagololoke omu méeso goómwe. Tibeene okuchilana,

²³ habwo kuba bóona bakozile ebiheno no obulami bwáabo tibukwoóleka ikuzo lya Múungu.

²⁴ Náho habwe embabazi ya Múungu, babálwe kuba abagololoke omu méeso goómwe, batéena kumuliha choóna chóona. Bachuungwiílwe kuluga omu biheno byáabo kulabila Kristu Yeézu.

²⁵ Múungu akamukola Yeézu aábe echitáambo cho kukwaátanisa abaantu na weényini. Omu kukwaátaniswa okwo abaantu nibabona kuganyilwa ebiheno byáabo, habwo kwiikiliza nka nikwo Yeézu akafwa habwa boónyini. Múungu akamukola Yeézu aábe echitáambo abone kwoóleka nka nikwo weényini no owa amazima, habwo kuba akeégumisiliza, talabachwaáziikile ha biheno éebyo bakakola obuchilo bwe enyuma.

²⁶ Mala akakola aátyo, abone kwoóleka amazima goómwe omu kuchwaáziika ebiheno omu buchilo obu. Nikwo alikukola omu buchilo alikubabalila abaantu áabo abalikumwiíkiliza Yeézu kuba abagololoke omu méeso goómwe.

²⁷ Ha bwéecho, tiheena nsoonga yoóna yóona yo kweésiingiza, habwo kuba kwiikilizibwa na Múungu nikulugiiilila omu kwiikiliza, ti habwo kweékomya ebilagilo.

²⁸ Nitusoomboókelwa nka nikwo Múungu niwe alikumubala omuuntu kuba omugololoke habwo kumwiíkiliza Yeézu kwoónka, ti habwo kweékomya ebilagilo bya Musa.

²⁹ Ngási, Múungu ni Múungu wa Abayahudi boónka? Mmahi! Ngási weényini náwe ni Múungu wa abo Abanyamahaánga? Éego, Múungu ni

Múungu wa abaantu bóona,

³⁰ habwo kuba heena Múungu oómo weénka. Weényini naababalila Abayahudi na Abanyamahaánga bóona, kuba abagololoke habwo kumwiikiliza Yeézu weénka.

³¹ Ngási, óobu katulikukomeenteleza kwiikiliza Yeézu, nihiingana no kugaamba nka nikwo, ebilangilo bya Musa tibiina mugaso? Mmahi, no obuche bwa akáti! Náho, katulaamwiikiliza Yeézu, niho tuláaba twaáhiikiliza góona áago ebilangilo bya Musa bilikulagila.

4

Ibrahímu akabalwa kuba owa amazima habwo kwiikiliza kwoómwe

¹ Mbwéenu, tugaámbe chiíha óobu habwa isíichwe Ibrahímu? Bitá Múungu akamubona kuba omuuntu omugololoke omu méeso goómwe?

² Kábilaaba Ibrahímu akabalwa kuba omuuntu omugololoke habwe ebikolwa byoómwe ebizima, niho yaakaábee ne echiintu cho kweésiingiza. Náho amazima ni nka nikwo, tayina choóna chóona cho kweésiingiza omu méeso ga Múungu.

³ Amaandiko Matakatífu nigagaamba gáti, “Ibrahímu akamwiikiliza Múungu, ha bwéecho Múungu yaámubalila kuba omuuntu omugololoke omu méeso goómwe.”

⁴ Mbwéenu, obuchilo omuuntu naakola emilimo, empeéla yoómwe tekubalwa hali weényini

* **4:1 4:1 Ibrahímu:** Habwo obusoomboozi bwooli osome *Obusoomboozi habwa Amagaambo Agagumile.* **4:3 4:3** Osome Okubaanza 15:6.

nko omusuumbuuso, náho na amazima goómwe agamukwiile alihwe.

⁵ Náho omuuntu óogwo atakutégeza ebikolwa byoómwe, kunu naamwiikiliza Múungu óogwo alikubala abaantu abazilwa kuba abaantu abagololoke, weényini Múungu naamubalila kuba omugololoke habwo okwo kwiikiliza kwoómwe.

⁶ Ni nko omukáma Daudi óokwo akagaamba habwo omugisa gwo omuuntu óogwo Múungu alikumubala kuba omugololoke atéena kuleeba ebikolwa byoómwe. Akagaamba nka nikwo,

⁷ “Béena omugisa abaantu áabo Múungu abaganyiiile ebiheno byáabo no kubisweekelela.

⁸ Ayina omugisa omuuntu óogwo Omukáma takumupéetela ebiheno byoómwe.”

⁹ Óobu, omugisa ogwo na habwa abaantu áabo abaasazilwe ikóba lyo obuséeza boónka, nali no óobu aha baantu áabo abatakusálwa ikóba lyo obuséeza? Niimbeezukiza nka nikwo Amaandiko Matakatífu galikugaambaho, Ibrahimú akamwiikiliza Múungu, ha bwéecho Múungu yaámubalila kuba omuuntu omugololoke omu méeso goómwe.

¹⁰ Mbweénu bikabaho bita? Obuchilo óobwo akaba asázilwe ikóba lyo obuséeza, nali akaba achaali? Bikabaho óobu akaba achaali atákasázilwe ikóba lyoómwe lyo obuséeza!

¹¹ Kusálwa ikóba kwa weényini ahaakulaatile, kukaba oluméeneko óolwo olwaayolekile nka nikwo Múungu akamubalila kuba omugololoke habwo kwiikiliza kwoómwe. Okwiikiliza okwo

akaba ayinakwo achaali atákasázilwe ikóba lyo obuséeza. Habwo omuháanda ogwo, Ibrahimú akakolwa kuba isíichwe wa abeekiliza bóona áabo abatákasázilwe ikóba, babone no óobu nábo kubalwa kuba abagololoke omu méeso ga Múungu.

¹² Mala, Ibrahimú ni iíse wa abaantu áabo abasázilwe ikóba lyo obuséeza, náho ti habwo okusálwa kwáabo. Ni isébo ha kuba boónyini nábo bamwiikiliize Múungu bátyo nyini nka Ibrahimú óokwo akamwiikiliza obuchilo atákasázilwe.

¹³ Múungu akalaganisa Ibrahimú na abaantu bo oluzáalo lwoómwe nka nikwo, yaakaábaheele éensi yóona eébe obuhuunguzi bwáabo. Múungu talalaageene aátyo habwo kuba Ibrahimú akaba naahikiiliza ebilangilo, náho habwo kuba akaba naamwiikiliza. Niho yaámubalila Ibrahimú kuba omugololoke omu méeso goómwe.

¹⁴ Nka abaantu abakwaasile ebilangilo baakwi-inaánkwiile obuhuunguzi obwo Múungu akabalanisa, habwo kuba baáhikiiliza ebilangilo, niho okwiikiliza ahali Múungu tikwaákubeele no mugaso. Káandi, endagano ya Múungu nayo yakaábeele eye ebisuba,

¹⁵ habwo kuba kuguluka ebilangilo, nikuleéta omuchwaáziiko. Náho obuchilo tiheena ebilangilo, niho tihaliho kukoongookela ebilangilo.

¹⁶ Echo nicho chilikuleételela endagano ya Múungu etegeze okwiikiliza kwoónka, habwo kuba neetegeza embabazi zoómwe. Habwo omuháanda ogwo, góona áago bakalaganisibwa abaantu bóona bo oluzáalo lwa Ibrahimú, gabe

ga mazima, ti aha Bayahudi kwoónka áabo abalikuhikiiliza ebilagilo, náho no óobu ahali abo abalikumwiikiliza Múungu nko óokwo Ibrahímu akakola. Ibrahímu niwe isíichwe twéena áabo tulikumwiikiliza Múungu.

¹⁷ Ni nko óokwo Múungu akamugaambila Ibrahímu omu Maandiko Matakatiifu aáti, “Naákutaho oóbe iíse wa amahaánga méenzi.” Ibrahímu akahaabwa endagano ezo kuluga hali Múungu, akamwiikiliza Múungu óogwo ababonesa abáfwiile obulami, no óogwo alagila ebiintu bibeho éebyo ebichaáliga kubaho.

¹⁸ Obuchilo Ibrahímu akagaambilwa amagaambo ago, chikaba chigumile kugeékiliza. Náho akazeendelela kwiikiliza no okutegeza nka nikwo Múungu naamukola aábe iíse wa amahaánga méenzi, habwo kuba Múungu akaba amugaambiile aáti, “Nikwo lulíba oluzáalo lwaawe.”

¹⁹ Obuchilo obwo, Ibrahímu akaba ayina nke emyáaka igana límo. Akamanya nka nikwo, omubili gwoómwe gwaábeele nko ogukabile, na Sáara mukázi woómwe akaba yaábeele omuguumba. Náho, okwiikiliza kwa Ibrahímu tikulacheehile.

²⁰ Káandi, talabeele no okutahwa tahwa kwoóna kwóona habwe endagano éezo Múungu akamweésagiza. Náho yaázeendelela kuguma omu kumwiikiliza no kumukúza,

²¹ habwo kuba akasoombookelwa aha mazima nka nikwo, áago Múungu akamweésagiza, yaakaáhicha kugakola.

²² Na ha kuba Ibrahímu akamwiikiliza, Múungu

akamubalila kuba omuuntu omugololoke omu méeso goómwe.

²³ Óobu, amagaambo áago, “Múungu akamubalila kuba omuuntu omugololoke omu méeso goómwe,” tigalaandikilwe habwa Ibrahimu kwoónka,

²⁴ náho gakaandikwa no óobu ha bwéetu chwéena. Amagaambo ago nigatugaambila nka nikwo katulaamwiikiliza Múungu óogwo akamuzoola Yeézu Omukáma wéetu kuluga omu bafwiile, niho no óobu íchwé nitubalwa kuba abagololoke omu méeso ga Múungu.

²⁵ Múungu akamusohozá Yeézu, abone kufwa habwe ebiheno byéetu, na akamuzoola kuluga omu bafwiile, tubone íchwé kubalwa kuba abagololoke omu méeso goómwe.

5

Omugisa gwo kumwiikiliza Múungu

¹ Habwo kuba Múungu yaátubaliile kuba abagololoke omu méeso goómwe, habwo okwiikiliza kwéetu, twiine obuhóolo náze omu kulabila Omukáma wéetu Yeézu Kristu.

² Habwo omuháanda gwo kumwiikiliza Yeézu, Múungu atuheéle embabazi yoómwe. No óobu nyini nituzeendelela kwiinaankula embabazi ezo. Nitunulilwa bwooli, habwo kuba nitutegeza tuláaba tuli hamo na Múungu omu ikuzo lyoómwe.

³ No óobu elaaba nitugweelwamo ebyaágälazo byoóna byóona, nituzeendelela kunulilwa,

habwo kuba nitusoomboókelwa nka nikwo ebyaágalalo nibituleetela okweéyomeleza.

⁴ Okweéyomeleza okwo nikwo kulikutubonesa kuba no omuganya muzima, nágwo nigutuleetela itegezo.

⁵ Itegezo éelyo tilikuhicha kutwíita omuganya, habwo kuba Múungu akatuseesela engoonzi zoómwe nyíinzi omu miganya yéetu, kulabila Omwooyo gwoómwe Omutakatíifu.

⁶ Mbwéenu, obuchilo óobwo íichwe tukaba tutéena kweézuna íichwe nyini, Kristu akeeza yaátufwéela íichwe abazilwa, no obuchilo óobwo bukaba buli bwo kugasa bwooli.

⁷ Chiba chigumile muno aha muuntu weéna wéena akuúnde kwítwa habwo omugololoke. Náho lúundi chikwiíle aha muuntu kweélamulila kufwa habwo omuntu ogwo owe entúungwa nzima weénka.

⁸ Náho Múungu naatwooleka nka nikwo ayina engoonzi mpaango neechwe ha muháanda ogu. Omu mwáanya ogwo íichwe tukaba tuchaáhena, weényini Múungu yaámusohozza Kristu kufwa ha bwéetu.

⁹ Óobu, habwe echigabo che enságama ya Yeézu Kristu, tubazilwe kuba abagololoke omu méeso ga Múungu. Bityo ha muháanda gwa Kristu mazima tulaáchuúngulwa náwe kuluga omu chihulumuko cha Múungu.

¹⁰ Obuchilo íichwe tukaba tuchaali ababisa boómwe, Múungu akatukwaátanisa íichwe na weényini kulabila olufu lwo Omutábani. Ha bwéecho, habwo kuba tukwáatanisiibwe túti, mazima tulaáchuúngulwa kuluga omu muchwaaziiko gwa Múungu kulabila obulami bwo Omutábani.

¹¹ Mbwéenu, kusaaga ago góona, Múungu atukozile tunulilwe bwooli, habwo kuba omu kulabila Omukáma wéetu Yeézu Kristu tukozilwe kuba abanywáani ba Múungu.

Adamu akatuleetela olufu, náho Yeézu atuheéle obulami

¹² Mbwéenu, kulabila aha muuntu oómo, echiheno chikataaha omu nsi, no okulabila echiheno éechi, olufu lwaátaahila. Na aha kazeendele áako, abaantu bóona nibafwa, habwo kuba bóona bahenile.

¹³ Kuba kulugiilila obuchilo Adamu yaáhenile kuhicha obuchilo óobwo Musa yaaheelwe ebilangilo, ebiheno bikaba bilimo omu nsi íila. Náho Múungu talababaliile abaantu kuba abaheni be ebilangilo, habwo kuba ebilangilo bikaba bitakabéeleho.

¹⁴ Mbwéenu, abaantu bóona abo obuchilo obwo, bakaba nibafwa. Olufu lukabatégeka, no óobu kábilaaba tibalakozile ebiheno byo kukoon-gookela echilagilo nko óokwo Adamu akakola.

Mbwéenu, Adamu akaba ali omususano gwa Yeézu Kristu óogwo ayaakwiizile ahaleéza.

¹⁵ Echiheno cha Adamu tichikwiingana ne embabazi ya Múungu na Yeézu Kristu. Adamu no omuuntu oómo óogwo akaleetelela abaantu bóona bafwe habwe echiheno choómwe. Náho heena oómo oóndi, Yeézu Kristu, óogwo alikubaha abaantu béenzi engabilano ye embabazi ya Múungu. Embabazi ezo, teyina ndeengo, neesaága bwooli echiheno cha Adamu!

¹⁶ Heena okuchilana kuháango omu ngabilano ye embabazi ya Múungu ne ezo eye entabukilano ye echiheno cha Adamu. Obuchilo echiheno

chimo éecho chikakolwa na Adamu, Múungu akachwaáziika abaantu no kubaha ennáku. Náho obuchilo ebiheno bíinzi bikoziilwe na abaantu, Múungu naababala abagololoke omu méeso goómwe, habwe engabilano zoómwe.

¹⁷ Bityo, echiheno cho omuuntu oómo, chikaleetelela olufu lutegeke abaantu bóona. Náho óobu mazima, abaantu bóona áabo abalikiwiinaankula embabazi ya Múungu éezo etéena ndeengo, ne engabilano yo kubalwa kuba abagololoke, balaátegeka omu bulami bwo bucha no buchiile, kulabila ogwo oóndi oómo, Yeézu Kristu.

¹⁸ Ha bwéecho, nko óokwo echiheno cho omuuntu oómo óokwo chalesile ennáku omu baantu bóona, bityo nyini káandi echikolwa cha amazima cho omuuntu oómo chikaleeta kubalilwa obugololoke óobwo obuleeta obulami omuli bóona.

¹⁹ Omuuntu oómo akáanga kumukoondookela Múungu, yaáleetelela abaantu béenzi babe abaheni. Bityo nyini, habwo omuuntu oómo akamukoondookela Múungu, yaáleetelela abaantu béenzi babe abagololoke omu méeso ga Múungu.

²⁰ Ebilagilo bya Musa bikeeza, byaáleetelela ebiheno kwoongela. No óobu bityo, obuchilo ebiheno bikoongela, embabazi ya Múungu nayo ekaguma kwoongela.

²¹ Mbwéenu, ebiheno bikaba nibitégeka abaantu no kubaleételela olufu. Bityo nyini, embabazi ya Múungu eébe neetegeka abaantu, habwo kubabalila kuba abagololoke, na áago gababonese obulami bwo obucha no obuchiile, kulabila aha Mukáma wéetu Yeézu Kristu.

6

Yeézu niwe akasiinga amagala ge echiheno

¹ Óobu tugaámbe chiíha? Ngási, tugume kuhena, kuba embabazi za Múungu zibone kwoongela?

² Mmahi, no obuche bwa akáti! Íchwe twaabele nka abáfwiile habwe empola zo okuhena. Ha bwéecho, titukwiile kuzeendelela kutúula káandi omu biheno.

³ Musoomboókelwe nka nikwo, obuchilo tuka-batizibwa omuli Kristu Yeézu, tukakwaátaangana náze omu kufwa kwoómwe.

⁴ Bityo, tukaba tuli nkoóti twaáfwiile no okuzi-ikwa hamo náze kuba neechwe tulame omu kazeendele ko obulami obusha, nko okwo Kristu akazoolwa kuluga omu bafwiile habwa amagala gi ikuzo lye Isíichwe Múungu.

⁵ Nko óokwo tukakwaátaangana na Kristu omu kufwa kwoómwe, bityo nyini nitukobana náwe omu kuzooka kwoómwe.

⁶ Nitusoomboókelwa nka nikwo obulami bwéetu obwo twaabele nitutuúla bukafwa hamo na Kristu aha musalaba, kuba amagala ge echiheno omuunda yéetu gatatutégeka káandi, no kutukóla kuba abahálila be echiheno.

⁷ Habwo kuba omuuntu alikufwa, naába ayaáteesulilwa kuluga omu magala ge echiheno.

⁸ Twaáfwiile hamo na Kristu, ha bwéecho nitwi-ikiliza nka nikwo nitutuúla hamo náze.

⁹ Habwo kuba nitusoomboókelwa nka nikwo Kristu akazooka kuluga omu bafwiile, talifwa káandi, olufu tilukumutégeka káandi.

¹⁰ Habwo kuba, káyaafwiile, akafwa no kuleekaana na amagala ge echiheno obucha

no obuchiile, óobu ali omulame, no omu bulami bwoómwe naamunuliza Múungu.

¹¹ Bityo nyini, neemwe hanu, mweébone nka nikwo mukafwa habwe echiheno, na nimutuúla habwo kumunuliza Múungu, omu kukwaátana na Kristu Yeézu.

¹² Ha bwéecho, ni lwaampaka echiheno chitatégeka emibili yáanyu éezo eéfwa, kuba mukoondoókele etuúngu mbi ze emibili yáanyu.

¹³ Mále mutazisohoza enzíingo ze emibili yáanyu kuba bibe nke ebikwáato habwe echiheno omu kukola obuzilwa, náho ímwe nyini mweésohoze habwa Múungu nka abaantu áabo bakazoolwa kuluga omu bafwiile, no kutaahibwa omu bulami obusha. Káandi musohoze enziingo záanyu hali weényini zibe ebikwáato bya amazima goómwe.

¹⁴ Echiheno tichilibatégeka káandi, habwo kuba timukweébeembeelwa ne ebilangilo, náho nimweebeembeelwa ne embabazi ya Múungu.

*Embabazi za Múungu nizileetelela
abeekiliza kukola amazima*

¹⁵ Mbweenu tugaámbe chííha? Ngási, tugume kuhena, habwo kuba titukweébeembeelwa ne ebilangilo, náho nitweebeembeelwa ne embabazi ya Múungu? Mmahi, no obuche bwa akáti!

¹⁶ Timukusoombookelwa nka nikwo, ahali weényini óogwo mulikweésohoza omu kukola áago alikweenda, niho mulikuba abalikumukoondookela nka abahálila boómwe? Mbweenu, kábilaaba nimuba abalikweésohoza kukola ebiheno, nimuba abahálila be echiheno,

ne ebiluga nnyúma byaáyo no olufu. Náho kamulikuba nimweesohoza kumukoondookela Múungu, nimuba abazáana ba Múungu, no omuzuumbuko gwaámo no obulami bwa amazima.

¹⁷ Kala, ímwe mukaba muli nka abahálila be echiheno. Náho niimusíima Múungu, habwo kuba óobu mwiikiliize omu miganya yáanyu yóona kugomookela ameégeso ga amazima áago mukeégeswa.

¹⁸ Mwaáhéelwe obweéyagaaluzi na Múungu kuluga omu buhalila bwe ebiheno, mwaaba abahálila boómwe aba amazima.

¹⁹ Niingaámba neemwe aha mugani gwa buli chilo, habwo kuba ímwe muchili abeélemwa omu kusoombookelwa. Mukaba nimukolesa enziingo ze emibili yáanyu kuba nka abahálila bo okukola obulofo ne ebikolwa bíbi, nabyo bikoongela bwooli. Náho óobu, ni lwaampaka muzikolese enziingo záanyu zibe nka abahálila bo kukola amazima, habwe echihika cho kwéezwa na Múungu.

²⁰ Kala, obuchilo mukaba muli abahálila be echiheno, mukaba muli abalikweétegeka, mutéena obweétegeeleza bwo kukola áago Múungu alikweenda.

²¹ Ngási mukabonesa mugaso chi habwe ebikolwa byáanyu byo obuzilwa, éebyo óobu bilikubakoza ensóni? Tiheenaho omugaso gwoóna gwóona! Amagaambo ago nigaleeta olufu lwo bucha no buchiile.

²² Náho óobu, habwo kuba mwaáhéelwe na Múungu kuluga omu buhalila bwe echiheno, mále, abakozile kuba abahálila boómwe, mubone-

size omugaso gwo kwéezwa no kwiinaankula obulami bwo bucha no buchiile.

²³ Omuuntu weéna wéena óogwo ali omuzáana we echiheno, empeéla yoómwe no olufu lwo bucha no buchiile. Náho íichwe, Múungu naatuha obulami bwo bucha no buchiile. Obulami óobwo tiyo empeéla, náho ne engabilano éezo tuliki-wiinaankula kulabila Kristu Yeézu, Omukáma wéetu.

7

Abeekiliza tibachitegekwa ne ebilangilo bya Musa

¹ Abeekiliza bazeenzi baanze, niingaámba neemwe, abaantu áabo mulikusoombookelwa kuzima ebilangilo bya Musa. Nimusoomboókelwa nka nikwo omuuntu naatégekwa ne ebilangilo obuchilo bwóona óobwo alikuba achili omulame.

² Ha mususano, echilagilo nichilagila nka nikwo, omukázi takwiikilizibwa kulekaana ne ííba obuchilo ííba achili omulame. Náho kábilaaba ííba yaáfwa, niho echilagilo echo tichikumwaángila káandi omukázi.

³ Bityo, kaálaaswéelwa no omuséeza oóndi obuchilo ííba achili omulame, naába omusiihani. Náho kábilaaba ííba yaáfwiile, echilagilo echo tichikumwaángila káandi, yaakaáhicha kuswéelwa no omuséeza oóndi, mala naába atali omusiihani.

⁴ Abeekiliza bazeenzi baanze, amagaambo ago nikwo galiho hali íimwe hanu. No óobu íimwe timukwaángilwa káandi ne ebilangilo bya Musa, habwo kuba mwaáfwiile hamo na Kristu aha musalaba. Óobu íimwe muli abaantu boómwe,

óogwo akazoolwa kuluga omu bafwiile, kuba obulami bwéetu bube ne emisumo mizima habwa Múungu.

⁵ Obuchilo óobwo entabuko yéetu ye ebiheno ekaba neetutegeka, ebilangilo bikakola etuúngu zéetu mbi zibe na amagala hali íchwé, tukaba nitukola ebiheno. Ha bwéecho, olufu lwaaba lwaábaho.

⁶ Tukaba tubohilwe ne ebilangilo, náho óobu twaáfwiile hamo na Kristu, na bityo yaátukozile kuba abeéyagaaluzi kuluga omu bilangilo. Óobu titukumuheéleza Múungu aha muháanda gwa kala gwo kweékomya ebilangilo éebyo bikaandikwa, náho nitumuheeleza habwo omuháanda omusha gwo kweébeembelelwa no Omwooyo Mutakatífu.

Ebiheno nibimanyiika habwe ebilangilo

⁷ Óobu tugaámbe chííha? Tugaámbe nka nikwo, ebilangilo nibileetelela ebiheno? Mmahi, no obuche bwa akáti! Kábilaaba ebilangilo byaakulekile kubaho, tinaákuhikize kusoombokelwa nka nikwo ebiheno ni chiintu chi. Káchaakubeele chitaliho echilagilo éecho echilikugaamba chíti, “Otaákweefuza echiintu cha muzeenzi waawe,” tinaákuhikize kusoombokelwa nka nikwo kuligila echiintu cho omuuntu oóndi, no okuhena.

⁸ Náho kulabila echilagilo echo, echiheno chikabonesa omwáanya gwo kuléeta etuúngu mbi za buli lugaanda omuli ínye. Kábilaaba ebilangilo byaakubeele bitaliho, ebiheno bikabeele ebitéena amagala.

⁹ Aha buchilo óóbwo nkaba ntakabisoom-bookilwe ebilangilo, nkaba niintuúla nko óókwo naábeele niinyeéndaho. Náho obuchilo naámanyile echilagilo, ebiheno byaaba na amagala bwooli na byaaba nibiindeetela olufu.

¹⁰ Naábona nka nikwo echilagilo echo, echaabeele chili habwo kuúmpa obulami, nichiiindeetela olufu.

¹¹ Kulabila echilagilo éecho, echiheno chik-abonesa omwáanya, chaámbeéhabéeha bwooli no kuundeételela olufu.

¹² Mbwéenu, esoombooke nka nikwo, ebilangilo bya Musa byóona ne ebitakatíifu, nabyo ne ebya amazima, na káandi ni biluunzi.

¹³ Ha bwéecho, ago geena ensoonga nka nikwo ebiintu ebyo bizima biindeetiile olufu? Mmahi, no obuche bwa akáti! Ebiheno nibyo biindetiile olufu habwo omuháanda gwe ebilangilo ebili bizima, kuba ebilangilo bibe nibyooleka butúnu nka nikwo, echiheno ne echiintu chibi bwooli.

¹⁴ Nitusoomboókelwa nka nikwo ebilangilo ne ebyo Omwooyo gwa Múungu, náho íinye omu ntabuko yaanze ye ebiheno, ndi omuhálila waábyo.

¹⁵ Íinye tiínkusoombookelwa éecho ndikukola. Éecho ndikweenda nkole, tiínkuchikola. Náho éecho ndikutamwa, echo nicho ndikukola.

¹⁶ No óókwo ndikukola amagaambo áago ntakweenda ngakole, nibyooleka nka nikwo niinyikiliza nkokwo ebilangilo ni bizima.

¹⁷ Mbwéenu áaho tíimba íinye óogwo ndikuhena, náho ne echo echiheno echili omuli íinye.

18 Niinsoomboókelwa nka nikwo, omuli ínye, omu ntabuko yaanze ye ebiheno, tihalimo chi-intu choóna chóona chizima. Nnyeenda kukola echizima, náho tiinyina obuhicha bwo kuchikola.

19 Amagaambo amazima áago ndikweenda kukola, tiinkugakola. Náho, amábi áago ntakweenda ngakole, nigo ndikukola.

20 Ha bwéecho, kaándikuba niinkola áago ntakweenda ngakole, áaho niimba ntali ínye óogwo ndikukola ebiheno, náho ne echo chiheno éecho echilikwiikala omuli ínye.

21 Mbwéenu, naákugula nka nikwo, obuchilo ndoonza kukola echiintu chizima, niinyesaánga nka nikwo éecho echili chibi nicho ndikukola.

22 Ebilagilo bya Múungu, niimbyeénda ha muganya gwaanze gwóona.

23 Náho naákugula nka nikwo enzíngo zo omubili gwaanze, ziba nizitegekwa na amagala ge ebiheno áago agasiingaangana ne ebiteékuzo byaanze ebizima. Amagala ago nigo galikuunkola ímbe enkwáate ye echo chilagilo che echiheno éecho echilikukola omulimo omu nziingo zo omubili gwaanze.

24 Neelóoko hali ínye! Noóha óogwo alaáchuúngula omubili gwaanze kuluga omu magala ge ebiheno áago agalikuuntwaáliza omu lufu?

25 Niimusíima Múungu, habwo kuba weényini niwe alaánchuúngula, kulabila hali Yeézu Kristu, Omukáma wéetu.

Ha bwéecho mbwéenu, ínye nyini aha bu-soombookelwa bwaanze ínye ndi omuhálila we ebilagilo bya Múungu, náho omu ntabuko yaanze

ye ebiheno, íinye iimba omuhálila we echiheno
éecho echilikukola omulimo omu nziingo zaanze.

8

Abeekiliza nibalama ha kweébeembelelwa no Omwooyo Mutakatíifu

¹ Mbweenu óobu, Múungu takuchwaáziika
abaantu áabo abakwaateene na Kristu Yeézu.

² Habwo omuháanda gwo kuunkwaátanisa na
Kristu Yeézu, amagala go Omwooyo Mutakatíifu
óogwo alikuleeta obulami bwo bucha no buchiile,
gaáankozile iímbe no obweéyagaaluzi kuluga omu
amagala ge ebiheno no olufu.

³ Ebilagilo bya Musa bikaba bitéena amagala go
kutuha obweéyagaaluzi, habwe entabuko yéetu
ye ebiheno. Náho ebyo bilagilo éecho bitalahik-
ize kukola, Múungu abikozile. Akamusiíndika
Omutábani nyakámo, kwiiza hali íichwe omu nsi
ayina omubili nke emibili éezo twiina íichwe
abaheni. Weényini yeesohoza omubili gwoómwe
gube echitáambo habwo kulamulilwa ebiheno
byéetu. Ha kukola aátyo, Múungu akachwaáziika
ebiheno aha mubili gwa Kristu,

⁴ kuba amagaambo góona ga amazima áago
galikweendelwa omu bilagilo gahikiilizwe kuz-
ima omuli íichwe. Íichwe nitweebeembelelwa no
Omwooyo Mutakatíifu, na titukweébeembelelwa
káandi ne entabuko yéetu ye ebiheno.

⁵ Abaantu áabo balikweébeembelelwa ne
entabuko yáabo ye ebiheno, ebiteékuzo
byáabo no omu kuhena. Náho áabo
abalikweébeembelelwa no Omwooyo Mutakatíifu,
ebiteékuzo byáabo biba omu kweenda kukola

ebikolwa éebyo ebilikumusemelela Omwooyo Mutakatífu.

⁶ Abaantu áabo ebiteékuzo byáabo bilikweébeembelelwa ne entabuko ye ebiheno, nibabonesa olufu lwo bucha no buchiile. Náho abaantu áabo ebiteékuzo byáabo bilikweébeembelelwa no Omwooyo Mutakatífu, nibabonesa obulami bwa buchiile no obuhóolo.

⁷ Abaantu áabo abalikweébeembelelwa ne entabuko yáabo ye ebiheno, abo na ababisa ba Múungu. Habwo kuba tibakukoondookela ebligilo byoómwe, káandi tibakuhicha kubyeeékomya.

⁸ Ha bwéecho, abaantu áabo abalikweébeembelelwa ne entabuko yáabo ye ebiheno, tibakuhicha kumunuliza Múungu.

⁹ Náho ímwe óobu, timukweébeembelelwa ne entabuko yáanyu ye ebiheno, náho nimweebeembelelwa no Omwooyo gwa Múungu, habwo kuba naatuúla omuli ímwe. Omuuntu weéna weéna óogwo aténa Omwooyo gwa Kristu,* ogwo aba atali omuuntu wa Kristu.

¹⁰ Óobu, Kristu naatuúla omuli ímwe. Ha bwéecho, no óobu emibili yáanyu elikufwa habwe ebiheno, Omwooyo Mutakatífu naabaha obulami, habwo kuba Múungu abapetiile kuba abeena amazima omu méeso goómwe.

¹¹ Omwooyo gwa Múungu óogwo alikutúula omuli ímwe, niwe Omwooyo gwo óogwo akamuzoola Kristu Yeézu kuluga omu bafwiile. Ha bwéecho, Múungu alaábaha obulami obusha, no óobu emibili yáanyu éezo eéfwa. Alaákola

* **8:9 8:9 Omwooyo gwa Kristu:** Omwooyo gwa Kristu niwe Omwooyo gwa Múungu, nali Omwooyo Mutakatífu.

aátyo ha amagala go Omwooyo Mutakatífu óogwo alikutúula omuli ímwe.

¹² Ha bwéecho, abeekiliza bazeenzi baanze, íchwe tekweendelwa tutuúle omu kweébeembelelwa ne entabuko yéetu ye ebiheno.

¹³ Habwo kuba, kamulaaba nimutuúla omu kweébeembelelwa ne entabuko yáanyu ye ebiheno, mazima nimufwa. Náho, kamulaayáanga butúnu aha magala go Omwooyo Mutakatífu, kukola amagaambo áago entabuko yáanyu ye ebiheno elikweenda mugakole, nimutuúla obucha no obuchiile.

¹⁴ Bóona áabo abalikweébeembelelwa no Omwooyo gwa Múungu, abo nibo abáana ba Múungu.

¹⁵ Habwo kuba, timuleénaankwiile Omwooyo gwo kubakola ímwe mube káandi abahálila áabo mulikumutína, náho mukeenaankula Omwooyo ogwo abakozile kuba abáana boómwe Múungu. Omwooyo ogwo nigwo gulikutukola tumuháme Múungu, “Aba” ensoonga yaáho, “Táata!”

¹⁶ Omwooyo ogwo gwoónyini nigukomeenteleza omu miganya yéetu nka nikwo, íchwe tuli abáana ba Múungu.

¹⁷ Mbwéenu, habwo kuba íchwe tuli abáana ba Múungu, tuleénaankula obuhuunguzi bwéetu hamo na Kristu. Náho éecho echilikweendelwa hali íchwe óobu ni nka nikwo, tukóbe omu lwaágalalo hamo na Kristu, tubone neechwe kukoba hamo náze omu ikuzo.

Múungu yaábaha ikuzo liháango abáana boómwe

18 Niimbóna nka nikwo, olwaágalalo lwéetu lwo obuchilo obu, ti kaantu, kaándikwiinganisa ni ikuzo éelyo Múungu alaatuha omu buchilo obwo obulikwiiza.

19 Ebiintu byóona éebyo bikahaangwa, nibili-indilila aha chihika chiháango obuchilo óobwo Múungu alaámanyisa butúnu abáana boómwe ni baáhi.

20 Habwo kuba ebihaángwa bikahaangwa omu kazeendele ko kusiisikala, ti habwo obweenzi bwaábyo, náho bikakolwa bityo ha ngoonzi za Múungu. No óobu bityo, buliho obwiítegezo,

21 habwo kuba bilaáchuungulwa kuluga omu buhálima bwo okusiisikala no olufu. Áaho niho bilyaáheebwa obweéyagaaluzi ni ikuzo éelyo Múungu aliha abáana boómwe.

22 Nitusoomboókelwa nka nikwo, no óobu hāti obu, ebihaángwa byóona nibyaambaza hamo ha busaasi bwo obusúungu, nko obusúungu bwo omukázi óogwo alikweéchuungula omwaana.

23 Káandi, ti nka nikwo ne ebiintu ebyo kwoónka éebyo ebilikwaambaza aha busúungu, náho neechwe nitwaambaza omu miganya yéetu. Twaáheelwe Omwooyo Mutakatífu óogwo ali engabilano ya mbele ya Múungu, tubone kuloza obuzima óobwo tulaahéebwa. Náho tucháali nitudugulima omu miganya yéetu, habwo kuba nituliindilila ha chihika chiháango bwooli obuchilo óobwo Múungu alaátuchuúngula kuba abáana boómwe omu kutuha enziingo eénsa.

24 Twiinabwo obweésige óobwo kulugiilila obuchilo Múungu yaátuchuúngwiile. Náho

kábilaaba nitweesiga kubona echiintu éecho twaakuhicha kuchileeba, okwo ti kutegeza. Ngási, noóha ayaakweesiga kuhaabwa echiintu éecho yaábonesize?

²⁵ Náho katulikutegeza kuhaabwa echiintu éecho tutakabonesize, niho tuchiliindilila no ok-weégumisiliza.

²⁶ Hamo na ago, Omwooyo Mutakatíifu niwe atuzuna omu bulemwa bwéetu. Habwo kuba íichwe titukusoombookelwa kumusaba Múungu okwo tulikweendelwaho tumusabe, náho weényini Omwooyo niwe atuneémbelala hali Múungu omu kachulile ko obusaasi obutakugaambwa.

²⁷ Múungu óogwo alikukaguza góona agali omu miganya yéetu, niwe alikusoombookelwa ebiteékuzo byo Omwooyo Mutakatíifu, habwo kuba Omwooyo óogwo gusabila abaantu ba Múungu nko óokwo Múungu ayeénda.

²⁸ Nitusoomboókelwa nka nikwo, Múungu akola amagaambo góona kuléeta ebizima omu baantu bóona áabo balikumwéenda,[†] áabo abeesilwe habwo kuhikiiliza echihika choómwe.

²⁹ Múungu akabamanya abaantu boómwe kulugiilila obuchilo nóobu éensi etakahaangilwe. Áabo nibo akabatóoza kuluga aha bubaandizo basusaniswe no omususano gwo Omutábani,

[†] 8:28 8:28 *Múungu akola amagaambo góona kuléeta ebizima omu baantu bóona áabo balikumwéenda:* Obusasaanuzi obúundi bukaáhicha kuba, amagaambo góona nigaleeta ebizima omu baantu bóona áabo balikumwéenda Múungu, nali omu magambo góona, Múungu akola emilimo hamo na abaantu bóona áabo nibamwéenda abone kubaha ebizima.

kuba Omutábani aábe niwe mukúlu omu beekiliza beenzi bazeenzi boómwe.

³⁰ Habwo kuba, áabo yaabele atoólize kuluga aha ntábuko, nibo áabo yaáyesile, abo yaábabala kuba abagololoke, na nibo áabo akabalaganisa nka nikwo alaábaha ikuzo.

Abeekiliza tibakuhicha kutaáganisibwa ne engoonzi za Múungu

³¹ Mbwéenu, tugaámbe chiíha óobu habwa amagaambo ago? Habwo kuba Múungu aliho ha bwéetu, taliho óogwo ayaakuhicha kutusínga!

³² Múungu talamuziliile echiganyizi Omutábani nyakámo náho akamusohoza aáfwe ha bwéetu chwéena. Mbwéenu, keélaaba Múungu akozile aátyo, mazima naatuha busa buli chiintu chóona hamo na weényini!

³³ Noóha óogwo yaakuhicha kubalegelela abatoziibwe na Múungu? Táliho, habwo kuba óogwo yaábabaliile kuba abagololoke ni weényini Múungu.

³⁴ Káandi noóha óogwo alaabalamulila omuchwaáziiko? Táliho, habwo kuba Kristu Yeézu akafwa no kuzoolwa yaaba omulame, káandi óobu ayikala olubazu lwo obúlyo lwa Múungu, weényini niwe alikutusabila.

³⁵ Ni chiintu chi éecho echaakuhicha kututaáganisa ne engoonzi za Kristu? Mmahi, tichiliho! No óobu bilaaba tuli omu lwaágalo luháango, tuli omu kuchuúndagulwa, tuli omu iífwa, nali kubulabulilwa ebizwáalo, nali omu buhuta, nali ichúmu, Kristu naazeendelela kutwéenda.

³⁶ Ni nko óokwo Amaandiko Matakatiifu galikusoomboola gáti,

“Buchile nituchwaaziikilwa ha kwítwa, habwo kuba tuli abeésigwa baawe. Nitutwaalizibwa nke entaama, zo kubáagwa kwoónka.”

³⁷ Náho no óobu bilaaba ago góona nigatusaánga, mazima íichwe nituzeendelela kusínga, omu kulabila hali Kristu óogwo alikutwéenda.

³⁸⁻³⁹ Nnyina obweétegeeze nka nikwo tiháliho chiintu éecho echilikuhicha kututaáganisa ne engoonzi za Múungu hali íichwe. Múungu naazeendelela kutwéenda, keélaaba tuli abalame nali twaáfwiile. No óobu maléeka,[‡] nali abeena obutégeki abali aha bwíile, nali ebihaángwa ebina amagala tibikuhicha kututaáganisa ne engoonzi zoómwe. No óobu amagaambo áago agalikweesuulukiza omu buchilo obu nali omu nchilo ezo ezilikwiiza, nali choóna chóona éecho echili omu igulu nali kuzimu,[§] nali choóna chóona omu nsi, tiháliho echiintu éecho echilikuhicha kututaáganisa ne engoonzi za Múungu hali íichwe. Engoonzi éezo atuheéle íichwe kulabila ahali Kristu Yeézu, Omukáma wéetu.

9

Paulo naayehulila obusúungu habwa abaantu ba Iziraeli

¹ Kristu naasoombookelwa nka nikwo áago ndikweenda kugaamba na amazima goónka. No óobu omuganya gwaanze óogwo

8:36 8:36 Osome Enzina 44:22. **‡ 8:38-39 8:38-39 Maléeka:** Habwo obusoomboozi bwooli osome *Obusoomboozi habwa Amagaambo Agagumile*. **§ 8:38-39 8:38-39 Kuzimu:** Habwo obusoomboozi bwooli osome *Obusoomboozi habwa Amagaambo Agagumile*.

gulikweébeembelelwa no Omwooyo Mutakatíifu nágwo niguunsuúmba nka nikwo, tiínkugaamba ebisuba.

² Mazima, ínye nnyina entíimba mpáango bwooli no obusaasi buháango omu muganya gwaanze

³ habwa abaantu bi ihaánga lyaanze. Kábilaaba nibikuundilana, naakeékiliize kuchenwa no kutaáganisibwa obutába hamo na Kristu, kabyaakuba kukola iínty kwaakubeele kwíine omugaso omu kubazuna abanyalugaanda bazeenzi baanze.

⁴ Abo nibo Abaiziraeli, abaantu áabo Múungu yaatoólize akabazila kuba abáana boómwe, yaábooleka ikuzo lyoómwe no okutaho endagano* nábo. Káandi akabaha ebilangilo byoómwe, hamo ne emilago yoómwe, no kubalagiilila akazeendele óokwo elikweendelwa bamulámye.

⁵ Boónyini ne enzáalwa za besiichwe enkúlu. Omu bazéele abo akalugamo Masihi[†] habwo obumuuntu bwoómwe, weényini niwe Múungu, Mukúlu wa byóona, akuzibwe obucha no obuchiile![‡] Amina.

⁶ Tiinyina ensoonga nka nikwo Múungu

* **9:4 9:4 Endagano:** Habwo obusoomboozi bwooli osome *Obusoomboozi habwa Amagaambo Agagumile.* † **9:5 9:5 Masihi:** Habwo obusoomboozi bwooli, osome echigaambo cha Kristu omu *Obusoomboozi habwa Amagaambo Agagumile.* ‡ **9:5 9:5 Omu bazéele abo akalugamo Masihi habwo obumuuntu bwoómwe, weényini niwe Múungu, Mukúlu wa byóona, akuzibwe obucha no obuchiile:** Obusasaanuzi obúundi yaakaáhicha kuba, *Omu bazéele abo akalugamo Masihi habwo obu muuntu bwoómwe. Múungu, Mukúlu wa byóona, akuzibwe obucha no obuchiile!*

akalemwa kuhikiiliza emilago yoómwe éezo akagaamba aha Baiziraeli. Ti bityo, habwo kuba ti nka nikwo Abaiziraeli bóona na abaantu ba Múungu owa amazima.

⁷ Ti nka nikwo abazáalwa bóona ba Ibrahimu nibo abáana boómwe ba amazima. Náho Múungu akamweésagiza Ibrahimu aáti, “Kulabila ahali Izáaka olaabona enzáalwa áabo balyéetwa abaawe.”

⁸ Ensoonga ye ebigaambo ebyo ni nka nikwo, tibo bóona áabo abazeelwe kwo omubili na Ibrahimu nibo bali abáana ba Múungu, náho na abo boónka abazeelwe kuluga omu ndagano ya Múungu hali Ibrahimu, abo abanyalugaanda nibo balikubalwa kuba abáana boómwe Múungu.

⁹ Habwo kuba echigaambo che endagano ezo ya Múungu chikaba chili chíti, “Omwaáaka oguleéza, omu muhaanguko nko ugu, ndyaásuba, na Sáara mukaawe alyáaba yaázigeeze omutábani.”

¹⁰ Káandi tigo ago goónka, náho Rebéka náwe akamuzaálila isíichwe enkúlu Izáaka abáana bali amaloongo.

¹¹⁻¹² Obuchilo amaloongo áabo batakazeelwe, na áaho babeele batakakozile choóna chóona chibe chizima nali chibi, Múungu yaámugaambila Rebéka aáti, “Omuzigeezo alaámuheéleza omulumuna.” Echigaambo éecho nichooleka nka nikwo Múungu naayéta omuuntu kwiingana ne echihika cha weényini Múungu, ti kwiingana na akazeendele ko omuuntu ogwo.

13 Ni nko óókwo Amaandiko Matakatiifu galikusoomboola gáti, “Yakobo nkamutóoza, náho Esau nkamutámwa.”

Múungu akola nko óókwo alikweendaho

14 Óobu tugaámbe chiíha habwa amagaambo áago? Tugaámbe nka nikwo Múungu ti wa amazima? Mmahi, no obuche bwa akáti!

15 Múungu weényini akamugaambila Musa aáti, “Ínye mmuzilila echiganyizi omuuntu óogwo ndikweenda kumuzilila echiganyizi, mala Ínye mmuzilila embabazi óogwo muuntu wi ndikweenda kumuzilila embabazi.”

16 Ha bwéecho, Múungu weénka niwe alikulamula kuganyila omuuntu weéna wéena, ti ha bweenzi nali echífu cho ogwo muuntu.

17 Léeba omu Maandiko Matakatiifu Múungu akamugaambila Farao omukáma wa Míisiri aáti, “Nkakubonesa kuba omukáma, mbone kwoóleka abaantu obuhicha bwaanze kulabila hali íiwe, ni iziina lyaanze likumuúke omu nsi yóona.”

18 Mbwéenu nu, Múungu azilila echiganyizi ha muuntu, nko óókwo Múungu ayeénda, no kumukola omuuntu oóndi aábe no omuganya gugumile, nko óókwo Múungu alikweenda.

19 Hamo, omuuntu yaakaáhicha kubúuza aáti, “Kábilaaba nikwo bili bityo, Múungu naahichaho aáta kuhanisa omuuntu weéna wéena? Noóha óogwo ayaakuhicha kwaángiza éecho Múungu alikweenda?”

20 Náho íiwe omuuntu, íiwe oli oóha kuhakana oótyo na Múungu? Ngási, echiseme chi ibúumba

9:13 9:13 Osome Malaki 1:2-3. 9:15 9:15 Osome Okuluga 33:19.

9:17 9:17 Osome Okuluga 9:16.

chikaáhicha kuhakana no omubúumbi waácho no kumubúuza chíti, “Ha bwaáchi okaambúumba oóti?”

²¹ Omubúumbi ayina obuhicha bwo kubúumba ibúumba nko óokwo alikweendaho. Yaakaáhicha kubúumba enyuungu ibili kuluga ibúumba elyo nyini, enyuungu eémo eéba habwe ebikoleso bi isima, ne eéndi eéba habwe ebikoleso bya buli chilo.

²² Nikwo bili ahali Múungu. Akeenda kwoóleka abaantu echihulumuko na amagala goómwe, náho akeégumisiliza bwooli abaantu áabo bakwíilwe kusikizwa.

²³ Akakola aátyo, kuba abone kwoóleka ikuzo lyoómwe likúlu habwa abaantu áabo akaloonza kwiinaankula echiganyizi choómwe. Akaloonza kuluga kala babone kuba náze omu ikuzo lyoómwe.

²⁴ Omuli abo baantu áabo yaáyesile, tulimo no óobu íichwe. Talayesile Abayahudi boónka, náho no óobu áabo abali Abanyamahaánga.

²⁵ Echo nicho éecho Múungu alikugaamba omu chitabu cho omubáasi Hosea aáti, “Abaantu áabo abatali abaánze, niimbeéta ‘Abaantu baanze.’ Na áabo ntalabeénzile, niimbeéta ‘Enfula zaanze.’ ”

²⁶ Káandi agaambile aáti, “Áaho baagaambíilwe báti, ‘Íimwe timuli abaantu baanze,’ áaho niho balyéetwa ‘Abáana ba Múungu óogwo ali omulame.’ ”

27 Káandi, omubáasi Isaya naagaamba habwa Abaiziraeli aáti,

“No óobu kábilaaba Abaiziraeli ni béenzi nko omusényi gwa aha chaambo che enziba, náho áabo abalaáchuúngulwa, ni báche.

28 Omukáma naabaha abaantu be éensi yóona omuchwaáziiko oguhikile atéena kwiililwa, nko óokwo akagaamba.”

29 Ni nko óokwo omubáasi Isaya akagaamba kala aáti,

“Yaakubeele atali Omukáma wa Abalwaanila Ngoma atatusigaliízehe oluzáalo luche íichwe Abaiziraeli twaakubeele twaásiingaalikile bóona nka abaantu ba Sodoma na Gomora.”

Abaiziraeli béenzi tibéena amazima omu méeso ga Múungu

30 Mbwéenu, tugaámbe chiíha óobu habwa amagaambo ago? Abaantu áabo abali Abanyama-haánga tibalaágaleele kuba abaantu abagololoke omu méeso ga Múungu, náho Múungu akababalila kuba abagololoke ha muháanda gwo kumwiikiliza Kristu.

31 Abaiziraeli bakaba nibaagalala kweékomya ebilangilo bya Musa babone kubalwa kuba abagololoke omu méeso ga Múungu, náho tibalahikize.

32 Ha bwaáchi tibalabazilwe kuba abeena amazima omu méeso ga Múungu? Habwo kuba bakategeza ebikolwa byáabo na tibalamwiikilize Kristu. Kristu niwe ibáale lyo kweékuumpáho

33 nko óokwo Múungu akagaamba omu Maandiko Matakatiifu aáti, “Muléebe, óokwo Sayuni niíntaho ibáale. Ibáale éelyo ni ibáale lyo kweékuumpáho abaantu, no oluchili lwo kubagwiisa, nályo nilibakola babe nibagwa. Omuuntu óogwo alikumwiíkiliza, taligooka no obuche bwa akáti!”

10

¹ Abeekiliza bazeenzi baanze, echo ndikweenda ha muganya gwaanze gwóona nka nikwo Abaiziraeli bachuungulwe. Éecho nicho ndikusaba ahali Múungu.

² Niinsuúmba nka nikwo, abaantu abo batiilého echífu cho kumukoondookela Múungu, no óobu bityo tibakusoombookelwa okwo Múungu alikweenda bamukoondookeleho.

³ Boónyini tibalakoondookiile omuháanda óogwo Múungu alikubabalila abaantu obugololoke, habwo kuba tibalagusoombookiilwe, káandi bakaloondela kuba abeena amazima ha muháanda gwo kukulaatila echilagilo cha Musa.

⁴ Kristu niwe omuhélo gwe ebilangilo byóona bya Musa, kuba abaantu bóona áabo abalikumwiíkiliza weényini, babone kubalwa kuba abagololoke omu méeso ga Múungu.

Abaantu bóona nibahicha kuchuúngulwa

⁵ Musa akaandika habwo kubalwa kuba abagololoke omu méeso ga Múungu habwo omuháanda gwo kukwáata ebilangilo aáti, “Omuuntu óogwo alikukola góona áago

agalikulagilwa omu bilagilo, naába no obulami habwo kubikoondookela ebyo.”

⁶ Náho habwo kubalwa kuba omugololoke omu méeso ga Múungu ha muháanda gwo kumwiikiliza, Musa akagaamba aáti, “Mutaákweebuza omu miganya yáanyu nka nikwo, ‘Noóha óogwo yaakaáhicha kuhanama olugulu kuhika omu igulu?’ ” Kugaamba tútyo nikumanyisa nka nikwo, mumusabe Kristu ayize ahaansi ezi.

⁷ Na Musa akagaamba aáti, “Mutaákweebuza nka nikwo, ‘Noóha óogwo alikuhicha kutúuka ahaansi kuhika omu liina elila lyo kuzimu?’” Kugaamba tútyo nikumanyisa nka nikwo, muléete Kristu kuluga omu bafwiile.

⁸ Náho éecho echilikugaambwa omu Maandiko Matakatiifu ne éechi, “Echigaambo cha Múungu chili héehi neewe, chili omu kanwa kaawe na chili omu muganya gwaawe.” Óobu, echigaambo echo nicho empola éezo tulikwaátula habwo kumwiikiliza Yeézu Kristu.

⁹ Empola ezo ni nka nikwo, koolikugaamba habwo omunwa gwaawe íwe nyini oóti, “Yeézu no Omukáma,” no kwiikiliza omu muganya gwaawe nka nikwo Múungu akamuzoola kuluga omu bafwiile, olyaáchuungulwa.

¹⁰ Kuba omuuntu kaálikumwiikiliza Yeézu Kristu ha muganya gwoómwe, niho alikubalwa kuba omugololoke omu méeso ga Múungu. Kaálikukúunda akagaamba okwiikilizákwe aha munwágwe, niho alikuchuúngulwa.

11 Amaandiko Matakatiifu nigagaamba gáti, “Buli muuntu óogwo alikumwiikiliza, taligooka no obuche bwa akáti!”

12 Amagaambo ago nigooleka nka nikwo, tihéena okutola aha Bayahudi nali áabo abali Abanyamahaanga. Heena Omukáma oómo weénka ha baantu bóona. Weényini naabahiíla bwooli ha bufula abaantu bóona áabo abaliku-musaba.

13 Habwo kuba Amaandiko Matakatiifu niga-gaamba gáti, “Buli muuntu óogwo alikwéeta ahi iziina lyo Omukáma, naachuungulwa.”

Okwiikiliza kuluga omu kwoólekeelelwa

14 Mbweenu, abaantu nibahicha báta kumwéeta kábilaaba bachaáliga kumwiikiliza? Káandi nibahicha báta kumwiikiliza kábalaaba bachaáliga kuhuliza empola zoómwe? Na nibahicha báta kuhuliza empola zoómwe kábilaaba bachaali kwoólekeelelwa?

15 Káandi abaantu nibahicha báta kuzeenda kwoólekeelela empola ezo kábalaaba batasiindik-ilwe? Ni nko óokwo Amaandiko Matakatiifu galikugaambaho gáti, “Kwiiza kwo omuuntu óogwo alikuleeta Empola Nzima, ne echigaambo chiz-ima bwooli!”

16 No óobu bityo, ti Baiziraeli bóona áabo abaaziinaánkwiile Empola Nzima ezo no kuzikoondookela, beenzi tibalekiliize. Niyo ensoonga omubáasi Isaya akamubúuza Múungu aáti, “Mukáma, noóha óogwo ayekiliize ago twaábasoombóoliile?”

10:11 10:11 Osome Isaya 28:16. **10:13 10:13** Osome Yoeli 2:32.

10:15 10:15 Osome Isaya 52:7. **10:16 10:16** Osome Isaya 53:1.

¹⁷ Ha bwéecho, abaantu nibahicha kumwiikiliza Kristu kábilaaba baáhulila empola habwa Kristu. Náho nibahicha kuhulila kwoónka kábilaaba empola ezo zaáyolekelelwa.

¹⁸ Mbwéenu, kábilaaba ni bityo, leka mbuúze. Ngási, Abaiziraeli tibalazihuliile ezo mpola? Na amazima nka nikwo bakazihulila, habwo kuba Amaandiko Matakátífu nigagaamba gáti, “Abaantu bagaambile empola za Múungu buli hóona.

No óobu kuhicha ha muhélo gwe éensi, bagaambile amagaambo goómwe.”

¹⁹ Leka mbuúze káandi. Ngási, obuchilo bahuliile ezo empola, tibalazisoombookilwe? Na amazima nka nikwo bakazisoombookelwa. Echi-gaambo cho kutaándika, Múungu akabagaambila Abaiziraeli kulabila hali Musa aáti, “Niimbakola mubazilile ichubi abaantu abo abatali bi ihaánga lyaanze. Na niimbakola mube nimunigahala na abaantu abo abali abasilu.”

²⁰ Mále, akabagaambila kulabila ha mubáasi Isaya aha bugimi aáti,

“Abaantu abo abatalaankwaabile, nibo baánkugula.

Na abaantu abo abatakutaabúuza empola zanze, nibo neemanyisa hali boónyini.”

²¹ Náho habwa Abaiziraeli, Múungu akagaamba aáti,

“Echilo chóona nkatégeleza engalo kuteélana na abaantu baanze,

náho boónyini ti bagololoke,
káandi na abagome.”

11

Múungu takaángile Abaiziraeli kuba abaantu boómwe

¹ Óobu niimbuúza nka nikwo, ngási, Múungu akanagilana abaantu boómwe? Mmahi, no obuche bwa akáti! Ínye weényini ndi Omuiziraeli, kuluga omu luzáalo lwa Ibrahimu, kuluga omu lugaanda lwa Benyaámini.

² Múungu talanagileene abaantu boómwe áabo akabatóoza kulugiilila obuchilo éensi etaka-haangilwe. Nali timukusoombookelwa éecho Amaandiko Matakátifu galikugaamba habwo omubáasi Eliya obuchilo akadugulumila Múungu habwa Abaiziraeli? Yaámuzila nka nikwo,

³ “Mukáma, abaantu aba beesile ababáasi baawe, no kukaambula amataámbilo gaawe. Ínye naásigala nyeénka, no obu nibaloónda kuunyíta neenye!”

⁴ Náho Múungu akamusubiza chiíha? Aka-gaamba aáti, “Neesigaliza abaantu ebihuumbi musaanzu (7,000) áabo abatakuteélela ebizwi ha kulamya Baali.”

⁵ No óobu nyini nikwo biliho, baásigaliileho Abaiziraeli báche kwoónka áabo Múungu yaa-toólize habwe embabazi yoómwe.

⁶ Batoziibwe habwe embabazi ya Múungu, ha bwéecho ti habwe ebikolwa byáabo. Kayaakuba

kutóoza kwoómwe nikutegeza ebikolwa byáabo, embabazi yoómwe neéba etachili embabazi káandi.

⁷ Ha bwéecho, amagaambo galiho gáti. Abaiziraeli bakaloondela kuba abeena amazima omu méeso ga Múungu, náho tibalabonesize. Na Abaiziraeli kwoónka áabo abatoolizwe na Múungu, niho bakabonesa. Abáandi áabo abasigaliile, Múungu akabakola babe ne emiganya elemiile.

⁸ Ni nko óokwo Amaandiko Matakatíifu galiku-soomboola gáti,

“Múungu akabakola babe ne emyooyo elemiile, akabasweeka améeso gáabo kuba batabona kuh-weeza,

káandi akabaziba amatwi bataákuhicha kuhulila. Nikwo bali kuhicha leélo éeli.”

⁹ No omukáma Daudi akagaamba aáti,

“Obuchilo nibakola amazenyi gáabo, Múungu agakole kuba oluzuumba lwo kubabasa, no omutege gwo kubagwiisa, na gabe omweéholelo gwáabo.

¹⁰ Améeso gáabo gaswéekwe ensiimbaazi, kuba bataákuhicha kuhwéeza káandi choóna chóona, ne emigoongo yáabo eyikale eyinamile buchiile, habwo olwaágalalo lwáabo.”*

11:8 11:8 Osome Okwiizukwa kwe Ebilagilo 29:4; Isaya 29:10.

* **11:10 11:9-10** Omu magaambo ago ge Enzina, Daudi naagaamba empola za ababisa boómwe. Óobu Paulo atweele amagaambo áago naagaambilila empola za Abaiziraeli áabo abalikwáanga kwiikiliza Empola Nzima habwo Omukáma Yéézu. Osome Enzina 69:22-23.

*Kwáanga kwa Abaiziraeli kubeele omugisa
ahali abo Abanyamahaánga*

¹¹ Óobu niimbuúza nka nikwo, ngási, Abaiziraeli bakeékuumpa kuhicha baásiingaalika butúnu? Mmahi, no obuche bwa akáti! Náho habwo kwáanga kwáabo obuchuúnguzi bwiizile aha Banyamahaánga. Aha muháanda óogwo, Múungu akeenda Abaiziraeli babone kubazilila ichubi.

¹² Kábilaaba okuhena kwa Abaiziraeli, kubabonesize embabazi mpáango hali abo Abanyamahaánga, no obuzilwa bwáabo bwo omwooyo bulesile omugisa muháango omuli abo Abanyamahaánga, mbwéenu ni butúnu nka nikwo kutaahibwamo kwáabo Abaiziraeli nikuba kwo omugisa bwooli!

¹³ Óobu, niingaámba neemwe, abo muli Abanyamahaánga. Mazima Múungu akaansiíndika kúba entumwa habwa abo abali Abanyamahaánga. Niinyesiingiza omulimo gwaanze,

¹⁴ omu kutegeza nka nikwo, kulabila emilimo yaanze, Abaiziraeli bazeenzi baanze nibabazilila iimwe ichubi lyo kubonesa obuchuúnguzi, na bityo niimbóna kubachuúngula abáandi omuli abo.

¹⁵ Léeba, obuchilo Abaiziraeli bakamwáanga Omuchuúnguzi, Múungu náwe akabaanga, akasemelana na abo Abanyamahaánga. Ha bwéecho, obuchilo Múungu alibeekiliza káandi Abaiziraeli, chilyáaba nka abáfwiile bazooka!

¹⁶ Kábilaaba omuuntu yaámuheéleza Múungu omwéezo gwoómwe gwa mbele, niguba

gwáaba omutakatíifu, no óobu omwéezo gwoómwe gwóona ogwaásigala niguba gwáaba omutakatíifu.†

17 Kuba, omu musili amatábazi agáandi ago omuzeituni gakanogolwa, na áaho aha chitako chi gaanogweelweho haamelaho engulukizi yo omuzeituni gwo omu chitúuntu. Íimwe Abanyamahaánga muli itábazi elyo omuzeituni ogwo, mwaaba mwaákobelana amagala no okunywa hamo amalila go omuzeituni omuli ogwo musili.

18 Ha bwéecho, mutabagaya áabo abaanogweelwe nka amatábazi. Muteésiingiza, mwiizuke nka nikwo, íimwe timukuzisutula emizi, náho níimwe áabo mulikusutulwa ne emizi.

19 Obúundi okaáhicha kugaamba oóti, “Áago matábazi gakanogolwa, íinye mbone kubibwa omu mwáanya gwaágo áaho gaanogweelwe.”

20 Éego, na amazima. Amatábazi ago gakanogolwa habwo kuba tigaleékiliize, náho íiwe oyemeeliile oótyo habwo kwiikiliza kwaawe. Ha bwéecho, otaákweesiingiza, náho omutínage Múungu.

21 Kuba Múungu akachwaáziika abo Abaiziraeli abali nka amatábazi ge entabuko yo omuzeituni, yakaahicha kukuchwaáziika neewe.

22 Muléebe óokwo Múungu aba ali enyeésagizi aha báandi, no obúundi óokwo alikubeéhoolela abáandi habwo omweéhoolelo muháango. Naabeehoólela áabo bakáanga kumwiikiliza, na

† 11:16 11:16 Abasomi béenzi nibagaámbe nka nikwo **omwéezo gwoómwe gwa mbele** niyo beese enkúlu ba Abaiziraeli áabo abali Ibrahimu, Izáaka na Yakobo.

naakuzilila íwe obweésagizi, koólizeendelela kumwiikiliza. Náho koólilekaho kumwiikiliza, neewe nyini noonogolwa.

²³ Kábilaaba Abaiziraeli áabo nibalekelela obugome bwáabo bakeekiliza, nibabibwa káandi, habwo kuba Múungu ayina obuhicha bwo kubabibaho káandi.

²⁴ Ha kuba íwe Omunyamahaánga, ha buteéka íwe oli nki itábazi lyo omuzeituni gwo omu chitúuntu. Náho oyihilweyo okwo, weeza kubibwa aha muzeituni óogwo ogukaba guhaambilwe omu musili, ahaantu áaho omu buteéka tiho haawe. Náho, Abaiziraeli omu buteéka ni nka amatábazi go omuzeituni oguli omu musili, na ne echigaambo chiche bwooli hali boónyini kubibwa káandi aha chitako cho omuti ogwo nyini ogwáabo.

Múungu aganyila abaantu bóona

²⁵ Abeekiliza bazeenzi baanze, niinyeénda musoomboókelwe habwe entaahililo ya Múungu éezo kala ekaba eli olufubo, kuba mutaákwiiza mukeésiingiza abeena amasala bwooli. Musoomboókelwe nka nikwo no omuli áabo Abaiziraeli abaabeele beena emiganya elemiile. Káandi, obugome bwáabo bukaba buli bwo omwáanya kwoónka, kuhicha basugeene Abanyamahaánga bóona baláaba baátaahile omu bukáma bwa Múungu.

²⁶ Habwo omuháanda ogwo, Abaiziraeli bóona balaáchuúngulwa. Ni nko óokwo Múungu aka-gaamba omu Maandiko Matakatífu aáti, “Omuchuúnguzi aleéza kuluga Sayuni,

alaákola enzaalwa za Yakobo baleke kumwáanga Múungu.

27 Áaho niho endagano yaanze nábo elaahikiílizwa, óobu ndeehaho ebiheno byáabo.”

28 Óobwo Abaiziraeli bakaba nibaánga Empola Nzima zo mwa Yeézu Kristu, bakeekola kuba ababisa ba Múungu. Náho echigaambo echo chaaba habwo mugaso gwáanyu, ímwe abaantu áabo muli Abanyamahaánga. No óobu bityo, Múungu achabéenda Abaiziraeli, habwo kuba akaba abatoólize beesébo enkúlu no kukola endagano nábo.

29 Múungu kaálikuba yaatoólize abaantu boómwe no kubáfuuha, tiyaákuhicha kuhiinduka.

30 Kala, ímwe timulamukoondookiile Múungu, náho óobu mweenaankula echiganyizi cha Múungu, habwo kuba Abaiziraeli tibalamukoondookiile.

31 Léeba, bityo nyini nibiba hali boónyini. Óobu tibakumukoondookela Múungu, náho nibeenaánkula echiganyizi cha Múungu káandi, habwo kuba nibabona óokwo ímwe mwiinaánkwiile echiganyizi choómwe.

32 Múungu akaboha abaantu bóona omu bugome bwáabo, abone kubazilila bóona echiganyizi.

Múungu akuzibwe

33 Ngási! Noóha óogwo yaakuhicha kusoombookelwa óokwo buli obuhite bwa Múungu,

11:27 11:26-27 Osome Isaya 27:9; 59:20-21; Yereimia 31:33-34.

11:29 11:29 Osome Abarúumi 9:4-5.

amasala no obumanyi bwoómwe?
Titukuhicha kubisoombookelwa!
Táliho omuuntu óogwo ayaakuhicha kusoomb-
bookelwa obulamuzi bwoómwe
nali kwoólekelela emiháanda yoómwe.

34 “Noóha ayaakuhicha kusoombbookelwa
ebiteékuzo byo Omukáma?

Noóha óogwo abeele ali omuhanuuzi woómwe?”

35 “Nali, noóha óogwo akamwoóhoza Omukáma
echiintu
éecho weényini alikweendelwa amusubize?”

36 Múungu niwe óogwo akahaanga ebiintu
byóona.

No kulabila hali weényini ebiintu byóona
nibizeendelela kubaho,
ne ebiintu byóona biliho habwi ikuzo lyoómwe.
Akuzibwe obucha no obuchiile! Amina.

12

*Mweésohoze obulami bwáanyu no kumukolela
Múungu*

¹ Óobu abeekiliza bazeenzi baanze, nimu-
soomboókelwa óokwo Múungu atuzilila echigany-
izi. Ha bwéecho, niimbatoozela nka nikwo,
mweésohoze emibili yéenyu ahali Múungu, mube
nke echitáambo éecho echili echiláme, ne echi-
takatíifu, éecho echilikumunuliza. Kukola mútyo,
nigwo omuháanda gwa mazima gwo kumulámya
Múungu.

² Mutátoolela obuteéka bwa abaantu be éensi ezi, náho muleke Múungu ahiindule emiganya yáanyu, mubóne kuba ne ebiteékuzo ebizima. Áaho niho mulaahicha kusoombookelwa áago Múungu ayeénda omu kugakola, na bityo nimubona kumanya nka nikwo ne echigaambo echili chizima, echilikumusemelela ne echihikile.

³ Óobu, kwiingana ne embabazi éezo Kristu am-bonesize ímbe entumwa yoómwe, niimbagaambila buli oómo wáanyu nka nikwo, ataákweebona nka nikwo agasize bwooli kuchila okwo alik-weendelwa aábe. Okuteekuza kwáanyu kube ne endeengo yo kwiingana no okwiikiliza okwo Múungu amugabiile buli oómo.*

⁴ Nko óokwo mulikumanya, twiina omubili gúmo, náho gwiina enzíingo nyíinzi, na buli luzi-ingo lutageene omulimo gwaálwo.

⁵ Bityo nikwo neechwe, tuli béenzi, náho twaa-bele omubili gúmo habwo kukwaátana kwéetu na Kristu. Aha mubili gwoómwe, buli muuntu no oluziingo ahali bazeenzíbe.

⁶ Ha bwéecho, twiine engabilano bunaanka bunaanka, nko óokwo Múungu akatuha kwiingana ne embabazi ezi yaátuhéele, ha bwéecho tuzikolese habwa bazeenzi béetu. Omuuntu óogwo aheelwe engabilano yo kusohozza obubáasi, azikolese ezo ngabilano kwiingana no okwiikiliza kwéetu.

* **12:3 12:3 Endeengo yo kwiingana no okwiikiliza okwo Múungu amugabiile buli oómo:** Obusasaanuzi obúundi bwaakaáhicha kuba, buli muuntu ayeleéenge kwiingana no okwiikiliza kwéetu.

7 Omuuntu óogwo aheelwe engabilano yo obuhalila, abakolele bazeenzíbe kuzima. Omuuntu óogwo aheelwe engabilano yo kweégesa, abeégesa kuzima.

8 Omuuntu óogwo aheelwe engabilano yo kubatiimbya omuganya bazeenzíbe, akole aátyo aha muganya gulikwéela. Omuuntu óogwo aheelwe engabilano yo kuzuna abaantu ebyo kubagasa, akole aátyo aha bufula. Omuuntu óogwo aheelwe engabilano yo obutwáale, ategeke ha chífu chóona. No omuuntu óogwo aheelwe engabilano ye echiganyizi, aganyile bazeenzíbe ha kusemelelwa.

Mweendane

9 Mubeénde bazeenzi báanyu habwe engoonzi za amazima ezitéena bugóbya bwoóna bwóona. Munobe echigaambo choóna chóona echo obuzilwa, mukole ebizima obuchilo bwóona.

10 Mweendane ímwe omuli ímwe nka abadugu abe éenda éemo. Buli muuntu amuzilile isima liháango muzeenziwe.

11 Mutaákuba abaléenga omu kukola emilimo yo Omukáma, náho mutagate omu mwooyo[†] ha kuzeendelela kumugomookela.

12 Musemelelwe habwo kuba nimutegeza kubonesa amazima áago Múungu akabalaganisa. Mweégumisilize omu ntíimba, na muzeendelele kumuneémbelela Múungu.

[†] **12:11 12:11 Mutagate omu mwooyo:** Obusasaanuzi obúundi bwaakaáhicha kuba, *Omwooyo Mutakatífu abazune muzeendelele kukola emilimo yo Omukáma ha muganya gwóona.*

13 Mubazune abatakatíifu‡ omu byeégasilo byáabo, na mweéyomeleze omu kubasaandukila abazenyi.

14 Abaantu áabo abalikubaágalaza ímwe, mubasabile nka nikwo Múungu abafúuhe. Náho mutaákuba nimubasabila nka nikwo bachéenwe.

15 Munulilwe hamo na áabo abalikunulilwa, na muchule hamo na áabo abalikuchula.

16 Muzeendane hamo omu chihika chimo. Mutaákuba nimweláata, náho mweécheeshe, mube no okukobana na abaantu abahabi. Mutaákweebona nka nikwo ímwe mweenka mwiina amasala.

17 Abaantu kábalaabakolela obuzilwa, mutabakólela obuzilwa. Náho mutekaáne ha kukola éebyo abaantu balaáleeba nka nikwo ni biluunzi.

18 Kábilaaba nibikuundilana, na kábilaaba óokwo mulikuhicha chigasize, muteelane omu buhóolo na abaantu bóona.

19 Enfula zaanze, muteehoólela enzigu, náho mumulekele Múungu akole aátyo. Habwo kuba omu Maandiko Matakátíifu Omukáma naagaámba aáti, “Kuliha enzigu no omulimo gwaanze, neenye ndaahoolela.”

20 Káandi, Amaandiko Matakátíifu nigagaámba habwo obutehoólela gáti,

“Kábilaaba omubisa waawe ayina enzala, omuzune echookulya.

Na kábilaaba ayina iliho, omuzune echo okunywa.

‡ 12:13 12:13 **Abatakatíifu:** Ensoonga ni, *abeekiliza bazeenzi báanyu.* 12:19 12:19 Osome Okwiizukwa kwe Ebilagilo 32:35.

Koólaazila oótyo, noóba nko owaámukumila amatoondo go omulilo ha mútwe gwoómwe.”§
 21 Otasiingwa no obuzilwa óobwo olikukolelwa na abaantu, náho obusíinge obuzilwa obwo omu kukola ebizima.

13

Tubagololokele abatégeki be éensi

¹ Buli muuntu naayeéndelwa kugololokela abatégeki be éensi. Habwo kuba, obutégeki bwóona buluga hali Múungu, káandi na abatégeki abaliho, niwe abakola kuba abatégeki.

² Ha bwéecho, omuuntu weéna weéna óogwo alikuhinyooza obutégeki bwáabo, naamuhinyooza Múungu óogwo akabata ahali obwo butégeki. No omuuntu kaálaasiingangana aátyo, naayeletelela omuchwaáziiko gwa Múungu.

³ Abatégeki tibakutiinisa omuuntu ogwo alikukola ebizima, náho óogwo alikukola amábi. Ha bwéecho, kábilaaba tokweenda omutíine omutégeki, oóbe nookola ebizima, náwe naakusiingiza,

⁴ kuba weényini no omuzáana wa Múungu, ne emilimo éezo alikukola eyina omugaso hali íiwe. Náho, koólaakola amábi, áaho íiwe nooyeen-delwa omutíine! Na amazima nka nikwo ayina obuhicha bwo kukweéhoolela. Omu kukola aátyo,

§ 12:20 12:20 *Noóba nko owaámukumila amatoondo go omulilo ha mútwe gwoómwe:* Abasomi béenzi nibateekuza nka nikwo ensoonga yaáho ni nka nikwo, noóba waámugoola habwe ebikolwa byoómwe bíbi habwa amazima gaawe. Osome Emibeelo 25:21-22.

naába omuhálila wa Múungu omu kuhikiiliza echihulumuko choómwe ahali ogwo alikukola amábi.

⁵ Ha bwéecho, ni lwaampaka kugololokela abatégeki be éensi. Okubagololokela kwáanyu kutaákuba na habwo kutína echihulumuko cha Múungu, náho mubakuze habwo kuba nimusoomboókelwa kuzima aha miganya yáanyu nka nikwo, Múungu naayeénda mube nimukola mútyo.

⁶ Káandi, na habwe ensoonga ezo, nicho mulikusoholeza oluhaambwe. Kuba abatégeki na abazáana ba Múungu, nibakola omulimo óogwo Múungu abaheéle bagukole.

⁷ Ha bwéecho, mube nimuha bóona ebibahikile. Musohoze oluhaambwe aha bahaámbya áabo abalikwiinaankula oluhaambwe. Mukole mútyo ahali buli ibáanza éelyo olikutóongwa. Na kábilaaba nimweendelwa kuzilila isima omuuntu óogwo ahikilwe kuhaabwa, mbwéenu mumugololokele.

*Engoonzi nigwo omuháanda gwo
kuhikiiliza ebilagilo bya Múungu*

⁸ Mutaákuba nimutoóngwa choóna chóona no omuuntu, náho kwoónka ibáanza lye engoonzi. Ogwo ayine engoonzi na muzeenziwe, niwe alikuhikiiliza ebilagilo bya Múungu.

⁹ Léeba, ebilagilo nibigaámba bíti, “Otasaambana, otaákwíta, otaákwíiba, no otaákweefuza echiintu cha muzeenzi waawe.” Náho, ebilagilo ebyo ne ebiindi byóona nibiteelani swa omu chilagilo chimo éecho echilikugaamba chíti,

“Omweénde muzeenzi waawe nko óokwo olik-weéyeenda íwe nyini.”

¹⁰ Omuuntu óogwo alikumweénda muzeenziwe, takumukolela amábi. Ha bwéecho, engoonzi nigwo omuháanda gwo kuhikiiliza ebilangilo bya Múungu.

¹¹ Mube nimukola ago góona, habwo kuba nimusoomboókelwa nka nikwo, esáaha yo kwi-imuka kuluga omu túlo yaáhkile. Léeba, obuchilo bwo obuchuúnguzi bwéetu buli héehi bwooli, kuchila aha bubaandizo óobu twaabaandize kwi-ikiliza.

¹² Óobu, itúumbi lyaázeendelela, heéliliza kuba omulucheeleléwa. Ha bwéecho, tuhúle ebikolwa bíbi éebyo ebikolwa omu nsiimbaazi, na tukwaáte ebikwáato byo omwaanga.

¹³ Tube na akazeendele kaluunzi nka abaantu áabo abalikutúula omu mwaanga gwe echilo chisha. Tutaákuba abaantu áabo abalikulya amazenye ge etuúngu zo omubili no obutamizi. Tutaákukola engaanda yoóna yóona yo kweélyaama buyaga. Tutaákuba abe enkuúngana, nali kuba abi ichubi.

¹⁴ Náho, Omukáma Yeézu Kristu aábe niwe omweébeembezi wáanyu. Muteekililizana no obuche bwa akáti kweébeembebelelwa ne entabuko ye ebiheno ha kukulaatila etuúngu zaáyo mbi.

14

Mutaákuchwaaziika abeekiliza bazeenzi báanyu

¹ Mumwiinaánkule omwiikiliza muzeenzi wáanyu óogwo owo obulemwa omu kwiikiliza

kwoómwe. Mutamuhakanisa habwe ebiteékuzo byoómwe.

² Omuuntu oómo naayikiliza omu kulya buli kaantu, náho omuuntu oóndi óogwo okwiikiliza kwoómwe kwiina obulemwa, atuungwa okulya omukubi gwa amababi gwoónka.

³ Omuuntu óogwo aálya buli chiintu, atamugaya muzeenziwe ogwo atakulya buli chiintu. Náwe omuuntu ogwo atakulya buli chiintu, atamuchwaaziikila muzeenziwe ogwo alikulya buli chiintu, habwo kuba Múungu amukuunzile aátyo nko óokwo aáli.

⁴ Íwe toyina obuzizi bwoóna bwóona bwo kuchwaáziika omuzáana wo omuuntu oóndi. Omukáma woómwe niwe alikusoombookelwa nka nikwo omuzáana woómwe yaáhena nali takahenile. No omuzáana woómwe naakola nko óokwo alikweendelwa, habwo kuba Omukáma Yéézu ayina obuhicha bwo kumwiímeeleza aábe naakola aátyo.

⁵ Omuuntu yaakaáhicha kuleeba nka nikwo echilo bunaanka chiina ensoonga kusaaga echilo echíindi, náho omuuntu oóndi naahicha kuleeba nka nikwo ebilo byóona nibisusana. Buli muuntu aábe naayetegeezeleza omu kukulaatila akateékulize koómwe óokwo yaálamula ni chilo chi echigasize.

⁶ Omuuntu óogwo alikuleeba nka nikwo echilo bunaanka chiina ensoonga kuchila ebilo ebíindi, naakola aátyo habwo kuba naayeénda kumunuliza Omukáma. No oóndi óogwo alikulya choóna chóona, naakola aátyo habwo kuba naayeénda kumunuliza Omukáma, tiyaákuhicha kulya choóna chóona atéena kumusiima Múungu.

No oóndi óogwo atakulya buli chiintu, naakola aátyo habwo kuba naayeénda kumunuliza Omukáma, náwe naamusiima Múungu.

⁷ Niingaamba iíntyó, habwo kuba táliho omuuntu omuli íichwe óogwo alikutúula habwa weényini weénka, nali óogwo alikukaba habwa weényini.

⁸ Obuchilo óobu tuli abalame, nitutuúla habwo Omukáma Yéézu. No obuchilo óobwo tulikufwa, nitufwa habwo Omukáma Yéézu. Ha bwéecho, kábilaaba tuli abalame nali nitufwa, íichwe tuli abaantu boómwe.

⁹ Ezi niyo ensoonga nka nikwo Kristu akafwa no kulama káandi, kuba aábe Omukáma wa abaantu bóona, abo abáfwiile na abalame.

¹⁰ Náho íiwe óogwo olikulya emikubi ya amababi yoónka, na ha bwaáchi noochwaaziika omwiikiliza muzeenzi waawe? Neewe óogwo olikulya buli chiintu, na ha bwaáchi noomugaya omwiikiliza muzeenzi waawe? Íichwe twéena tulaáyemeelela omu méeso ge echitébe chi ikuzo lya Múungu, náwe alaátuchwaáziika buli oómo wéetu.

¹¹ Ni nko okwo Amaandiko Matakatiifu okwo galikugaamba gáti,

“Mazima, Omukáma Múungu agaamba, buli muuntu alaátéela ebizwi omu méeso gaanze, na buli muuntu aha lulími lwoómwe alaámukuza Múungu.”

¹² Ha bwéecho, buli oómo wéetu, alyeégaamba weényini omu méeso ga Múungu.

*Óogwo ayaákomiile omu kwiikiliza kwoómwe
atamukuúmpisa oóndi óogwo atakakomiile*

¹³ Ha bwéecho, tuhúle kweéchwaaziika. Tula-mule kuleka kukola choóna chóona éecho cho ku-muleételela omwiikiliza muzéenzi wéetu kukola ebiheno nali kumuta omu bileengeso.

¹⁴ Habwa ameégeso go Omukáma Yeézu, ni-insoomboókelwa aha bweetegeeleza nka nikwo, tihaliho ehookulya choóna chóona echilofo.* Náho kábilaaba omuuntu naabona ehookulya bunaanka ne echilofo, aho niho ehookulya echo chibeele echilofo hali weényini.

¹⁵ Ha bwéecho, kábilaaba íwe noomuleetelela omwiikiliza muzeenzi waawe asáase bwooli omu muganya gwoómwe obuchilo noólya ebyookulya bunaanka, áaho niho olikuba waáleka kumwéenda muzeenzi waawe. Ha bwéecho, oteekiliza no obuche bwa akáti nka nikwo, ehookulya chaawe chibe entaahililo yo kuhaba kwo omuuntu oóndi óogwo Kristu akafwa habwa weényini!

¹⁶ Otakola chiintu éecho íwe olikuchibona ni chizima, chibe nichizumwa na abáandi nka nikwo ne chiintu chibi.

¹⁷ Kuba empola zo obukáma bwa Múungu† ti habwo okulya no okunywa, náho ne empola habwo kukola amazima, kutúula omu obuhóolo no omu manulilwa. Áago góona nigakuúnda habwo kuzunwa no Omwooyo Mutakatiifu.

* **14:14 14:14 Echilofo:** Habwo obusoomboozi bwooli, osome echigaambo cha *Obutába no obulofo* omu *Obusoomboozi habwa Amagaambo Agagumile*. **14:14 14:14** Osome Mariko 7:18-20.

† **14:17 14:17 Obukáma bwa Múungu:** Habwo obusoomboozi bwooli osome *Obusoomboozi habwa Amagaambo Agagumile*.

18 Omuuntu óogwo alikumuheéleza Kristu aátyo, naamunuliza Múungu, káandi naasiimwa na abaantu.

19 Ha bwéecho mbwéenu, tukole echífu obuchilo bwóona ha kukola amagaambo áago agalikuléeta obuhóolo omu beekiliza bazeenzi béetu, na áago agalikubagúmya omu kwiikiliza.

20 Otaákusiisa omulimo gwa Múungu habwe ebyookulya byoóna byóona éebyo olikweenda. Mazima, ebyookulya byóona nibiikilizibwa kulíibwa, náho ni kubi aha muuntu kulya ehookulya choóna chóona éecho echilikuleételela muzeenzi waawe kuhena.

21 Ni kuzima okazila kulya enyama, nali okunywa evíni,‡ nali kukola choóna chóona éecho echaakukutwaalilila kumutamisa omwiikiliza muzeenzi waawe.

22 Óobu íiwe, okwiikiliza kwaawe óokwo oyinakwo oyikále nakwo íiwe weénka omu méeso ga Múungu kwoónka. No omugisa kukola éecho olikuteékuza nka nikwo na amazima otéena kweéchwaaziikila íiwe nyini.

23 Náho, weéna wéena óogwo alikugumwa gumwa habwe ehookulya éecho alikulya, óogwo naába yaáchwaaziikwa na Múungu, habwo kuba ogwo naakola éecho alikwiikiliza nka nikwo ni chibi omu méeso ga Múungu. Kábilaaba omuuntu kaálaakola choóna chóona éecho atakwiikiliza nka nikwo ni chizima, áaho naába yaáhena.

15

‡ 14:21 14:21 *Evíni*: Habwo obusoomboozi bwooli osome *Obusoomboozi habwa Amagaambo Agagumile*.

Kweémanya no okweendana

¹ Mbwéenu, íichwe áabo twaákomiile omu kwiikiliza, nitweendélwa kubeémela bazeenzi béetu áabo abalikweélemwa omu kwiikiliza. Tubahwéele omu bulemwa bwáabo, na tuleke kukola amagaambo áago tulikunulizwa íichwe nyini.

² Buli oómo wéetu, akole amagaambo go kumunuliza omwiikiliza muzeenziwe habwo mugaso gwoómwe, abone kugumisibwa omu okwiikiliza.

³ No óobu Kristu weényini, talakozile amagaambo áago agamunuliza weényini weénka. Náho áago akakola gakaba gali nko óokwo eyaandikilwe,

“Ebizumi éebyo balikukuzuma íiwe Múungu, bikaánsaanga neenye.”

⁴ Góona áago agaayaandikilwe kala omu Maandiko Matakátifu, gakaandikwa habwo kutweégesa íichwe. Amaandiko áago agalikutuhweela kweégumisiliza omu lwaágalalo lwéetu na nigatutiímbya, tubone kúba ni itegezo.

⁵ Múungu niwe entabuko yo kweégumisiliza no kututiímbya emiganya. Óobu, niinsaba nka nikwo, abakole muzeendane hamo aha chihika chimo, habwo kuba nimumutoolela Kristu Yeézu.

⁶ Áaho niho íimwe mwéena nimuhicha kumukúza Múungu, Iíse wo Omukáma wéetu Yeézu Kristu, aha chihika chimo na ahi iláka límo.

*Múungu naabeekiliza Abayahudi
na áabo abatali Abayahudi*

⁷ Óobu, mube nimweeyiinaánkula ímwe omuli ímwe, nko óokwo Kristu akabeénaankula ímwe, kuba abaantu babone kumukúza Múungu.

⁸ Habwe ensoonga niimbagaambila nka nikwo, Kristu akeeza kuba omuzáana wa Abayahudi, abone kuboóleka nka nikwo, Múungu no omweésigwa. Habwo omuháanda gwa Kristu, Múungu ahikiliize endagano zóona éezo akalagana ahali beesébo enkúlu.

⁹ Káandi, akeeza kubonesa abaantu áabo abatali Abayahudi bamukuze Múungu habwe echiganyizi choómwe. Ni nko óokwo Amaandiko Matakatiifu galikugaamba gáti,

“Mbwéenu, niinkusiingiza omu baantu ba amahaánga agáandi,
Niinkuzinila enzina zo kulikúza izína lyaawe.”

¹⁰ Káandi, Amaandiko nigagaámba gáti,

“Ímwe abaantu ba amahaánga agáandi,
munulilwe hamo na abaantu ba Múungu!”

¹¹ Káandi, Amaandiko nigagaámba gáti,

“Ímwe abaantu bóona ba amahaánga agáandi,
mumukuze Omukáma.

Ímwe abaantu bóona,
mumukuze bwooli!”

¹² No óobu omubáasi Isaya náwe akagaamba aáti,
“Omuuntu oómo kuluga omu chitáko cha Yese aléeza,

náwe alaátégeka amahaánga góona.

Na abaantu ba amahaánga góona,

balyaámutegeza nka nikwo, weényini
alaábachuúngula.”

¹³ Múungu niwe óogwo tulikutegeza nka nikwo alaákola góona áago akatweésagiza. Ha bwéecho, niimbabila nka nikwo, ababonese obuhóolo bwóona na manulilwa góona obuchilo nimuzeendelela kumwiíkiliza. Áaho niho muláaba ni itegezo liháango, habwo kuba nimuzunwa na amagala go Omwooyo Mutakatíifu.

Echihika cha Paulo cho kwaandika olwaandiko

¹⁴ Abeekiliza bazeenzi baanze, nnyine itegezo nka nikwo ímwe muli abaantu abe emiganya mizima, na mwiina obuhicha bwo kusoombookelwa kuzima óokwo mulikweendelwa mukole, káandi mwiina obuhicha bwo kweéhanuza.

¹⁵ No óobu bityo, naábaandikila amagaambo agáandi omu lwaandiko óolu aha bugimi, mbone kubeézukiza amagaambo ago. Naázila iíntyó, habwo kuba Múungu,

¹⁶ ambonesize embabazi zo kuba omuheéleza wa Kristu Yeézu habwa abaantu áabo abali Abanyamahaánga. Nkaheebwa omulimo gwo obugabe bwo kubalaangaanila Empola Nzima kuluga ahali Múungu, kuba babone kwéezwa no Omwooyo Mutakatíifu. Bityo, nibaba nke echigabo éecho echilikumunuliza Múungu.

¹⁷ Óobu, habwo kukwaátana kwaanze na Kristu Yeézu, niinhicha kweésiingiza obuchilo niimuheezeza Múungu kulabila hali weényini.

¹⁸ Neenye tiíndileengesa kugaamba echigaambo choóna chóona echíindi, náho ebyo

byóona éebyo Kristu akakola kulabila hali íinye. Akakola Abanyamahaánga bamukoondoókele, kulabila amagaambo áago nkaba niingaámba no omulimo óogwo nkaba niinkola.

¹⁹ Bakakwéeswa kukoondookela, habwo kuba kulabila hali íinye bakabona obuzizi bwa Kristu aha manyiso na amahano. Nkahicha kugakola habwo obuzizi bwo Omwooyo gwa Múungu. No omu kukola ebyo, nkazoongoloka buli hóona niinyolekeelela Empola Nzima habwa Kristu, kubaandiza omu chikaali cha Yeruzaléemu kuhika omu iboma lya Iluriko.

²⁰ Omuli ago góona, niinyeyomeleza kwaátula Empola Nzima ahaantu áaho abaantu bachaáliga kwoólekelelwa empola habwa Kristu. Ni-inkola íintyo, ntaákwiiza kwoómbeka ahaantu áaho omuuntu oóndi yaámazile kutaho oluhazo lwoómwe.

²¹ Óokwo ndikukola, ni nko óokwo Amaandiko Matakatiifu galikugaambaho gáti,
“Abaantu áabo bachaáliga kwoólekelelwa empola
zoómwe,
nibo balizibona,
na abaantu áabo bachaáliga kuzihuliza,
nibo balaazisoombookelwa.”

Omweétegeko gwa Paulo gwo kuzeenda Rúumi

²² Emilimo ezo nizo zikaba niziinzibila bwooli kwíiza okwo hali íimwe.

²³ Náho óobu, tíinchiina emilimo yaanze omu byaalo éebi, na aha kuba ne emyáaka mínzi óobu mbele niinyegoónga bwooli kwíiza hali íimwe,

24 niintegeza kubayeélela no kwíikala hamo neemwe aha mwáanya muche, no omuganya gwaanze gubone kunulilwa ha kuba neemwe. [Niinhiingula hali íimwe] obuchilo niinzeénda omu nsi ya Spania, na niintegeza muunzune omu luzeendo lwaanze.

25 Mbwéenu óobu, niinzeénda Yeruzaléemu mbone kubasoholeza omusolo abeekiliza bazeenzi béetu abo óokwo.

26 Abeekiliza abali Makedonia na Akaya, bakabona ni kuzima kusohoza omusolo, babazune abahabi omu beekiliza abali okwo Yeruzaléemu.

27 Áabo boónyini bakalamula kukola bátyo. Náho na mazima nka nikwo nibatoóngwa kubazuna, habwo kuba bakobile hamo na Abayahudi omu migisa zo obuchuúnguzi éezo zilabila aha Bayahudi. Ha bwéecho, abeekiliza abatali Abayahudi nibeendelwa babahweele Abayahudi ha kubaha ebiintu byáabo.

28 Obuchilo níimba naámazile omulimo ogwo gwo kubatwaálila abeekiliza ba Yeruzaléemu echeégasilo echo, niimbaánza oluzeendo lwaanze lwo kuzeenda Spania, na niindeétwa hali íimwe.

29 Niinsoomboókelwa nka nikwo, obuchilo ndéeza hali íimwe, niinyíza no omugisa guhikiili-ile bwooli gwo mwa Kristu.

30 Abeekiliza bazeenzi baanze, habwo kukwaátana kwéetu no Omukáma wéetu Yeézu Kristu, na habwe engoonzi zo Omwooyo Mutakatíifu éezo atuheéle, niimbasaba aha muganya gwaanze gwóona nka nikwo, mweéyomeleze kukwaátana neenye omu kuúnsabila ahali Múungu.

³¹ Muunsabile nka nikwo, abaantu omu nsi ya Yudea okwo áabo abatakumwiikiliza Yeézu Kristu, bateéza bakaanzila kubi. Káandi muunsabile nka nikwo abatakatíifu bo okwo Yeruzaléemu, beekilize kwiinaankula echeégasilo éecho ndikubatwaálila.

³² Bityo, Múungu kaálaayeénda, ndéeza hali íimwe omu manulilwa bwooli, mbone kuba no obuchilo bwo kuhuúmula hamo neemwe.

³³ Múungu óogwo alikubaha obuhóolo, aábe hamo neemwe mwéena. Amina.

16

*Paulo naasiindika empola
aha baantu bunaanka bunaanka*

¹ Niinyeénda kubamanyisa munyaányeechwe Fibi. Weényini no omuheéleza we ekelezia éezo eli Kenkrea.

² Niinsaba mumunyegeze kuzima, habwo kuba náwe no omwiikiliza wo Omukáma Yeézu. Mumunyegeze nko óokwo elikweendelwa omu beekiliza ba Yeézu Kristu. Káandi, niinsaba nka nikwo, mumuzune na choóna chóona éecho kumugasa, habwo kuba weényini náwe akahweela abaantu béenzi, hamo neenye.

³ Munyaángalukize Prisila hamo na Akila. Abo na abahálila bazeenzi baanze omu milimo ya Kristu Yeézu,

⁴ na bakeelilila kubuza obulami bwáabo ha bwaánze. Tíwe íinye nyeénka óogwo ndikubasiima, náho no óobu abeekiliza áabo Abanyamahaánga omu makelezia góona,

nibabasiima. Munyaángalukize abeekiliza áabo ababa nibakoba kusaba omu nzu yáabo.

⁵ Munyaángalukize engaanzi yaanze Epaineto. Weényini niwe owo kubaanza kumwiikiliza Kristu omu chaalo cho okwo Asia.*

⁶ Munyaángalukize Mariamu óogwo akeéyomeleza aha chífu kukola emilimo hali íimwe.

⁷ Munyaángalukize Androniko na Yunia, Abayahudi bazeenzi baanze, áabo bakabohwa hamo neenye omu ibóhelo. Bakanyibeembelela omu kumwiikiliza Kristu, káandi bakumuukile bwooli omu ntumwa.†

⁸ Munyaángalukize engaanzi yaanze Ampuliato, omwiikiliza wo Omukáma wéetu Yeézu Kristu.

⁹ Munyaángalukize Urbanus, omuhálila muzéenzi wéetu omu milimo ya Kristu, ne engaanzi yaanze Stakisi.

¹⁰ Munyaángalukize Apele. Weényini akaba ali omweésigwa omu bileengeso bíenzi habwa Kristu. Káandi munyaángalukize abaantu bo omúka ya Aristobulo.

¹¹ Munyaángalukize Herodioni, Omuyahudi muzeenzi waanze. Munyaángalukize abaantu bo omúka ya Narkiso áabo abalikumwiikiliza Omukáma wéetu Yeézu Kristu.

¹² Munyaángalukize Trifaina na Trifosa. Abakázi áabo nibeeyomeleza bwooli kukola emilimo yo Omukáma wéetu Yeézu Kristu.

* **16:5 16:5 Asia:** Éechi chikaba chili echaalo omu butégeki bwa Abarúumi, ebilo éebi nicheétwa Buturuki. † **16:7 16:7 Bakumuukile bwooli omu ntumwa:** Obusasaanuzi obúundi bwaakaáhicha kuba, abalikukuzwa bwooli ne entumwa.

Káandi, munyaángalukize engaanzi yaanze Persisa. Óogu náwe no omukázi óogwo ayegumisilize bwooli kukola emilimo yo Omukáma wéetu Yeézu Kristu.

¹³ Munyaángalukize Rufoni, omutoózibwa wo Omukáma wéetu Yeézu Kristu, munyaángalukize na nyina. Nyina óogwo akaanzuna nka máaha omuzéele.

¹⁴ Munyaángalukize Asinkrito, Flegoni, Herme, Patroba, Herma, na abeekiliza bóona abali hamo náze.

¹⁵ Ha muheleeluko, munyaángalukize Filologo na Yulia, Nerea na muhala wáabo, na Olimpa, hamo na abatakatífu bóona abali hamo nábo.

¹⁶ Mweéyaangaluche aha chinyweégelo echi-takatífu. Abeekiliza ba amakelezia góona ga Kristu, nibabaangalucha.

Paulo naabahana abeekiliza

¹⁷ Óobu, abeekiliza bazeenzi baanze, niimbaséega nka nikwo, mube méeso na abaantu áabo abalikuleételela obutaániso omu beekiliza. Abaantu áabo nibaleetelela abeekiliza kukola ebiheno, na nibaganuga ameégeso áago mukeégeswa. Mweélige hala nábo!

¹⁸ Abaantu ba akazeendele áako tibaku-mukolela Kristu, Omukáma wéetu, náho éecho balikuloonda no kukulaatila etuúunku záabo zoónka. Nibagaámbo amagaambo malunzi go kweéseengeleza, náho nibabeéha abaantu abalikwiikiliza empola ze ebisuba aha bwiila.

¹⁹ Abaantu bóona bahuliíze óokwo muliku-mukoondookela Omukáma hali byóona. Echi-gaambo echo nichiiinnuliza bwooli. No óobu bityo, niinyeénda mube na amasala bwooli omu

kukola amagaambo agasemiile, na mweélige no obuzilwa bwoóna bwóona.

²⁰ Náwe Múungu óogwo alikubaha obuhóolo, takwiílilwa, bwaangu alaálitabagula elyo Isitáani[‡] ahaansi ya amagulu gáanyu.

Embabazi yo Omukáma wéetu Yeézu Kristu eébe hamo neemwe. [Amina.]

²¹ Timoteo, omuhálila muzeenzi waanze, naabaangalucha. Káandi, Abayahudi bazeenzi baanze Lukio, Yaasoni na Sosipatro, nibabaangalucha.

²² No óobu ínye Tértio, omwaandiki wo olwaandiko óolu lwa Paulo, niimbaangalucha habwo Omukáma.

²³ Gayo óogwo ínye Paulo ndikwiikala owoómwe, náwe naabaangalucha. Omúka yoómwe abeekiliza bóona be ekelezia ya aha niho bakoba. Káandi Erasto, óogwo no omubiiki we empilya wo omu iboma éeli,[§] naabaangalucha. Aha muheleeluko, mudugu wéetu Kwaátuusi naabaangalucha.

[
²⁴ Embabazi yo Omukáma wéetu Yeézu Kristu eébe hamo neemwe mwéena. Amina.]

Paulo naamukuza Múungu

²⁵ Óobu, tumukuze Múungu! Weényini naahicha kubakola mube nimuguma omu kwiikiliza kwáanyu, kulabila omu Mpola Nzima habwa Yeézu Kristu éezo nkaba niinyolekeeleda hali

[‡] **16:20 16:20 Isitáani:** Habwo obusoomboozi bwooli osome Obusoomboozi habwa Amagaambo Agagumile. [§] **16:23 16:23** Omu muzihwa ogwo lúundi nibo omu muzihwa ba Korinto.

íimwe. Empola éezo ekaba eli olufubo buluga kala,

²⁶ náho óobu, etiiilwe ha bwéelu, no kulabila omu Maandiko Matakatífu ga ababáasi, empola éezo zikumuukile omu baantu ba amahaánga góona omu nsi. Múungu wo bucha no buchiile niwe alagiile empola ezo zaatulwe omu baantu bóona, kuba abo káandi babone kumwiíkiliza no kumukoondookela Omukáma Yeézu.

²⁷ Múungu nyakámo, niwe owa amasala, óogwo kulabila hali Yeézu Kristu ikuzo liina weényini obucha no obuchiile! Amina.

Endagano Eénsha omu Chiziinza
Portions of the Holy Bible in the Zinza language of
Tanzania: Endagano Eénsha omu Chiziinza (New
Testament+)

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a